

**Folkehøjskolerit pillugit Inatsisartut inatsisaata allanngortinnera pillugu Inatsisartut
inatsisaat nr. xx, xx. xxx 2017-imeersoq**

*(Ilinniartitaanermut, Kultureqarnermut, Ilisimatusarnermut Ilageeqarnermullu
Naalakkersuisumut saqqummiunneqartoq)*

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

siunnersuutip aappassaaneerpeqarneranut

ISUMALIUTISSIISSUTAA

Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap suliarinninnermini ilaasortarai:

Inatsisartunut ilaasortaq Mimi Karlsen, Inuit Ataqatigiit, Siulittaasoq
Inatsisartunut ilaasortaq Vivian Motzfeldt, Siumut, Siulittaasup tullia
Inatsisartunut ilaasortaq Laura Táunâjik, Siumut
Inatsisartunut ilaasortaq Peter Olsen, Inuit Ataqatigiit
Inatsisartunut ilaasortaq Henrik Fleischer, Partii Naleraq

Ulloq 28. april 2017-imi siullermeerinninnerup kingorna ataatsimiititaliap siunnersuut
misissorpaa.

1. Siunnersuutip imarisaa siunertaalu

Siunnersuummi matumani ilaatigut folkehøjskolerit inuiaqatigiit piginnaasanik
kivitseqataanissannut kissaatigineqarnerisa akuerineqarnissaa anguniarneqarpoq.
Tamatuminnga kissaateqarnek nunatsinni suliffeqarfiit piginnaasaannik atorluanerup
pitsaanerulernissaanik siunnersuuteqartoq naliliivoq, tassami Folkehøjskolerit
atorluarneruneqarnisassammata. Naalakkersuisoqarfiit suliamut attuumassuteqartut,

folkehøjskolerit aamma KANOKUKA-p isumasioqatigiinnerat tunngavigalugu Inatsisissatut siunnersuut manna suliarineqarpoq. Suliniuteqarnerit ilaatigut folkehøjskolerit ilinniartunik misilitsitsisalernissaasa saniatigut folkehøjskolerit atuarfimmi atuartitsissutinik misilitsissutaasussanik atuartitsinissamut periarfissaqalernissaannik imaqassapput. Tamatuma saniatigut pisortat aningaasatigut tapissutigisartagaasa annertuumik allangortinneqarnissaat siunnersuutigineqarpoq, taamaaliornikkut folkehøjskolerini pilersaarusernerit eqaannerusumik ingerlanneqartalerniassammata.

2. Siunnersuutip inatsisartuni siullermeerneqarnera

Folkehøjskolerit atuunnerisa nukittorsarneqarnissaat siunnersuutip siullermeerneqarnerani tapersorsorneqarpoq. Taamaattorli folkehøjskolerinut aningaasat pisortaniit tapissutigineqartartut pillugit ersarinnerusumik nassuiaasoqarnisaa kissaatigineqartoq oqaatigineqarpoq, tamatumani najoqqutassami pissusissamisoortoqarnerisooq nalilersuinnermut atorneqarnissaa kissaatigineqarluni. Kingullertullu apeqqutigineqarpoq folkehøjskolerit kalaallisut taaguuteqartinneqarnerisut.

3. Tusarniaanermi akissutit

Tusarniaanermi piffissaq 19. december 2016-imiit 24. januar 2017-imut ingerlanneqarsimavoq. Tusarniaaneq taamaalilluni sapaatip akunnerinik tallimanik sivissussuseqarpoq. Nalinginnaasumik nassuiaatini ersippoq siunnersuut sivikitsumik folkehøjskolerinut tusaarniaatigineqarsimasooq.

Kalaallit Nunaanni sulisitsisut saniatigut Namminersorlutik Oqartussat Naalakkersuisoqarfiini, Knud Rasmussenip Højskolerianut, Sulisartut Højskolerianut, SIK-mut, KANUKOKA-mut, NUSUKA-mut, IMAK-mut, AK-mut, IK/ASG-mut, Ilisimatusarfimmut, nuna tamakkerlugu GUX-inut, INULI-mut, KTI-mut, Kalaallit Nunaanni Imarsiornermik Ilinniarfimmut, NI-Nuuk-mut, Peqqissaavimut, Perorsaanermik Ilinniarfimmut, Savaatilinnut Ilinniarfimmut, Eqqumiitsuliornermut Ilinniarfimmut, Danmarkimi Kalallit Illuutaanut, kommuninut ataasiakkaanut, Nuuk Internationale Friskolimut, Avalak-mut, ILI ILI-mut, KIK-mut, Center for National Vejledning-imut kiisali MIO-mut siunnersuut tusarniaatigineqarsimavoq. Siulittaasoqarfimmi tamanna pillugu piimasaqaatit tunngavigalugit tusarniaanermi akissutit qulit tunniunneqarsimapput.

Ataatsimut isigalugu Naalakkersuisunit nukissat pisariaqartut pingarnerutissagaat aammalu tusarniaaffigineqartut uparuaataat, oqaaseqaataat, siunnersuutaat, naqqiutaat il.il pissuissamisoorlumik oqaaseqarfigisassagaat ataatsimiititaliamit kaammattuutigineqassaaq. Aningaasartuutissanut tunniunneqarsimasunut il.il pisariaqartinnarsorinartut pillugit

oqaaseqaatinut tunngatillugu ataatsimiititaliamit Naalakkersuisunut erseqqissaatigineqassaaq, aningaasanut inatsisit naggataarutaasumik inatsisartunit akuersissutigineqartarnerata Naalakkersuisunit innersuussutigineqarnera naammangimmat. Naalakkersuisut sukulluunniit aningaasanut inatsisissamut siunnersuuteqartussaapput, taamatuttaarlu inatsisissatut siunneruummut matumunnga Naalakkersuisut siunnersuuteqartuullutik.

Taamaalilluni siunnersuuteqartoq pisussaavoq aningaasatigut kingunissaritinneqartut nalilersussallugit tunngavilersussallugillu, tamatumunnga ilanngullugu aningaasatigut tapersorsorneqarnissamut il.il. pisariaqarsorinartut. Taamaattumik siunnersuutip aningaasalersorneqarneranut oqaaseqaatit nalilersuinerillu ersarinnerusumik Naalakkersuisunit nassuiarneqartussaagalarput. Suliffeqarfimmit aalajangersimasumit aningaasartuutissat inatsisip aalajangersagaani ersinngippata, tamanna aningaasatigut nalilersuinermi allannguutissat inatsisissatut siunnersuutip aalajangersagaanik allannguinnissamik pisariaqalersitsissanngillat. Aningaasaqarnikkut tunngavissat piariaqartut aalajangiiffigiinissamut tunngavissanut taamatuttaaq pingaaruteqartigalutik aamma ilaapput taamaattumillu ataatsimiititaliamit naatsorsuutigineqarpoq Naalakkersuisut inatsisissatut siunnersuutaanni tamatumunnga tunngasunik Naalakkersuisut oqaaseqaateqarnissaat.

4. Aningaasaqarnermut najoqqutassiaq pillugu paasissutissiineq

Ulloq 27. april 2017 siunnersuut manna pillugu inatsisitigut kingunissaritinneqartut Naalakkersuisunit ataatsimiititaliamut nassuiaatigineqarput. Ataatsimiinnermi Kultureqarnermut, Ilinniartitaanermit, Ilisimatusarnermit Ilageeqarnermullu Naalakkersuisup neqeroortigaa inatsisissatut siunnersuumi ilinniartut ilinniagaqarnerisuteqartinneqartarnerat pillugu aningaasatigut aalajangersakkat malittarisassallu pillugit ersarinnerusumik allakkatigut nassuiaateqarnissaq. Ilisimatitsissut ulloq 11. maj 2017 ataatsimiititaliamut kiisalu partiinut ataatsimiititaliami sinniissoqanngitsunut nassiunneqarpoq. Ilisimatitsissut ersarisoq paasiuminartorlu ataatsimiititaliamit qujassutigineqarpoq, taannalu isumaliutissiisummut uunga **ilanngussaq 1-tut** kakkiunneqarpoq.

Ataatsimiititaliap siunnersuummik suliaqarnerani ilisimatitsissut ilanngunneqarpoq – imm. 5 aamma 6 ataani. Taamaattorli ilisimatitsissummi ilanngunneqartunut ataani allassimasumut ataatsimiititaliaq ima oqaaseqassaaq.

”Siunnersuut suliaavoq inassuteqaataasunut naapertuuttumik, siumoortumillu tusarniaasoqarluni aamma pisortatigoortumik folkehøjskolinut kommuninullu tusarniaasoqarpoq, taakkunanngalu siunnersuummut ilaliisoqarluni.”

Avataaniit suleqatigineqartut siunnersuummut tapersersuinerinnaanngitsumik oqaaseqaateqassappata, siunnersuummi immikkoortut nalornissutigineqartut pillugit

oqaaseqarnerit ilanngullugit Naalakkersuisut oqaaseqarfigisassagaat ataatsimiititaliamit kaammattuutigineqassaaq. Taamalillugu ataatsimiititaliamit paasineqarpoq ilaatigut Knud Rasmussenip Højskoliata (KRH) siunnersuummi aningaasatigut najoqqutassaritineqartumut nangaassuteqarnini oqaatigisimagaa. Taamaattorli oqaatigineqarsinnaavoq inatsisissatut siunnersuummut tusarniaanermut akissuteqaatinut nalinginnaasumik nassiuatini KRH-p isornartorsiulluni apeqqutai takuneqarsinnaammata.

5. Apeqqutit

Ataatsimiititaliap siunnersuummik suliaqarnerminut atatillugu Kultureqarnermut, Ilinniaritaanermut, Ilisimatusarnermut Ilageeqarnermullu Naalakkersuisoq arlalinnik apeqquteqarfigisimavaa. Ataatsimiititaliap apeqquteqaatai aamma apeqqutitut akissuteqaatit **ilannussat 2-tut aamma 3-tut** isumaliutissiissummut uunga kakkiunneqarput.

6. Siunnersuutip ataatsimiititaliamit suliarineqarnera

Nunatsinni inuiaqatigiit piginnaasaasa qaffassarneqarnissaanut folkehøjskolit atorneqarsinnaanerisa ilimanaateqarnera tunngaviatigut ataatsimiititaliamit qujarunneqarpoq. Nunatsinni ilinniaqassutsip qaffassarneqarnissaanut atorneqarsinnaasut tamarmik atorneqarnissaat nunatta pisariaqartippaa. Inuiaqatigiinni piginnaasanik qaffassaanissamut pisariaqartitsisunut aammalu ulluinnarni ilinniarfinni neqeroorutigineqartartunik allaanerumik inunnut inuttut ineriartornissamut allatut iliuuseqarnissamut pisariaqartitsisunut nalinginnaasumik sammisassanut uani folkehøjskolit pingaarutilimmik inississinnapput. Tamatumunngali atatillugu ataatsimiititaliamit oqaatigineqassaaq, ilinniarfiit, fokehøjskolit, piginnaasanik qaffassaasarfiit tamarmik il.il. immikkut piginnasanik nukittorsaanissamut pingaaruteqarlunnarmata – tamanna aamma inuttaasut akileraarutaannik eqqortumik atuinissamut tunngavoq.

6.1 Folkehøjskolit kalaallisut taaguutaat

Aallaqqaasiullugu inersuarmi folkehøjskolit taaguutaat pillugit oqaaseqartoqarneranut ataatsimiititaliaq naatsunnguamik ima oqaaseqassaaq. Folkehøjskolit kalaallisut taaguutaat oqaasersiaavoq – oqaaseq allamiut oqaasiinit, uani danskit oqaasiinit, tigusaq. Oqaasiliortut pillugit Inatsisartut inatsisaat nr. 12, 26. oktober 1989-imeersuni una takuneqarsinnaavoq:

§ 1. Oqaasiliortut suliasaraat oqaatsit oqariartaatsillu nutaat, naalisakkat ilanngullugit, katersussallugit, nalunaarsussallugit akuerissallugillu.

Imm. 2. Oqaasiliortut suliasaraattaaq kalaallit oqaasii pillugit pisortat inuillu siunnersortassallugit.

Imm. 3. Aammattaaq oqaasiliortut suliasaraat suliffeqarfiit kalaallisut aammalu

Kalaallit Nunaanni atersuisartut imaluunniit atissanik inassuteqartartut suleqatigissallugit.

Imm. 4. Naalackersuisut oqaasiliortut sulianik allanik imm. 1-3-mi taaneqartunut assingusunik suliassissinnaavaat.

§ 2. Oqaasiliortut tallimanik ilaasorta qarput marlunnillu sinniisussa qarlutik Inatsisartut toqqagaannik

Imm. 2. Ilaasortat ukiuni sisamani atasartussatut toqqarneqartassapput.

Imm. 3. Oqaasiliortut siulittaasortik namminneerlutik qinertassavaat sulinerminnilu ingerlatseriaasissartik aalajangersassallugu, taamaattorli tak. § 4.

§ 3. Oqaasiliortut allattoqarfiat pillugu malittarisassat erseqqinnerusut Naalackersuisut aalajangersassavaat.

Tamatuma malitsigaa, ataatsimut isigalugu kalaallisut taaguutinik, ilutsinik oqariartaatsinilluunniit nutaanik pisortatigoortumik atorneqartussanik inatsisartuni ataatsimiititaliat imaluunniit inatsisartut aalajangersaasinnaangimmata – aamma inatsisit assigusut tunngavigalugit oqaasersianik akuersissutiginnitarnermi tamanna atuuppoq. Taamattumik oqaasersiat assersuutigalugu folkehøjskolit, biilit, internet il.il. ullutsinnut naleqqutuugaluarpata, pissusissamisooraluarpata kissaatigineqaraluarpataluunniit pisrtatigoortumik oqaasiliortut tamakku nalilersortussaavaat. Tamatumunnga atatillugu oqaatigineqassaaq oqaasiliortut pillugit inatsisissatut siunnersuut ataatsimiinnermi matumani suliarineqartussaammat (UPA2017/124). Naak oqaasiliortut suliassaat allanngortinneqaraluartut oqaasersianik aalajangiisarneq suli oqaasiliortunit suliarineqartartussaavoq.

6.2 Siunnersuutip immikkoortui nutaat

Siunnersuummut nalinginnaasumik nassuiaatini takuneqarsinnaavoq folkehøjskolit, nalackersuisoqarfiit suliamut attuumassuteqartut, aamma KANUKOKA suleqatigalugit siunnersuut manna suliarineqarsimammat. Taamaaliornikkut suliassami kukkunernik minnerusunik iluarsininnermut aqqutissaq aalajangersimasooq atorlugu suliaqarnermut taarsiullugu soqutigisallit sunneeqataanissaasa periarfissaqarnerunissaat ammaanqarsimavoq. Suleriaaseq tamanna arlaleriarlugu ataatsimiititaliamit kaammattuutigineqartarsimavoq, taamaattumillu Naalackersuisut siunnersuummik matumunnga suliaqarnerminni atorsimammassuk ataatsimiititaliamit pitsaasutut isineqarluni. Inatsisinik aamma nutarterinernik sulinermut atatillugu suleriaatsip taassuma atorneqartarnissaa ataatsimiititaliamit neriuutigineqarpoq.

Siullermeerinninneq kiisalu ataatsimiititaliamit namminermit suliarineqarnera tunngavigalugu

siunnersuutip immikkoortui misissussallugit ataatsimiititaliamit aalajangiunneqarpoq.

Siunnersuutip imm. 2-a tunngavigalugu folkehøjskolit misilitsinnissamut piareersaatit kisiisa neqeroortugisinnaanngilaat, kisiannili suliffeqarfiit pisorta qarfiilluunniit nalinginaasunik tamakkuninnga suliaqartut suleqatigalugit atuarfimmi misilitsissutaasunik milititsisinnaalissapput. Taamaalillunilu akuersissutiginninneq ima isumaqartussaavoq, illoqarfinni folkehøjskolilinni marlunni Sisimiut Qaqortorlu – suliffeqarfiit pisortanit (ilaanakortumik) aningaasaliiffigineqartartut atuarfimmi misilitsissutaasussanik neqeroorsinnaalissapput, tassa Majoriaq folkehøjskolillu. Marloqiusanik suliniuteqarnissamut periarfissaq tamanna pillugu Naalakkersuisut ataatsimiititaliap apeqquteqaataanut ilanngussaq 2-mi apeqqutit 4 aamma 5-mut Naalakkersuisut ima akissuteqarsimapput:

”4. Folkehøjskolit naggataarutaasunik soraarummeernernut aningaasaliiffigineqaqqinnerannut neqeroorsinnalernissaanut siunertarineqartumi iluaqutissat aamma ajoqutissat pillugit Naalakkersuisut nassuiaateqaqqunearput.

a. Suna akikinnerussava: I) Folkehøjskolit Majoriamik suleqateqalissapput taamaalillutik folkehøjskolini ilinniartut Majoriami inaarutaasunik misilitsissinnaalerlutik? Imaluunniit II) Assigiinnik marlunnik pilersitsisoqassaaq, taamaalillutik meeqqat atuarfiani inaarutaasunik misilitsinnerit Majoriap aamma folkehøjskolit ingerlatilerlugit. ”

(Ataatsimiititaliap apeqquteqaatai – ilanngussaq 2)

”Naalakkersuisut isumaqanngillat misilitsinnerit ingerlanneri imminerminni annertunerusunik aningaasartuutaaneruffiussasut, sumiluunniit ingerlanneqaralarunik”

(Apeqqut 4-mut Naalakkersuisut akissuteqaataannit tigulaagaq. Ilanngussaq 3)

”5. Majoriap illoqarfinni pineqartuni inaarutaasunik misilitsinneq tigummippassuk meeqqat atuarfiani inaarutaasunik misilitsinneranik tigumminissamut folkehøjskolit pisinnaatitaanissaat marloqiusamik sulinertut isigineqarsinnaasorinarpoq. Taamatut marloqiusamik suliaqarneq tassungalu atatillugu marloriaammik aningaasalersuineq nunatta karsiani aningaasanik ikereeqisumik atorluaanertut Naalakkersuisunit isigineqarpa?”

(Ataatsimiititaliap apeqquteqaatai – ilanngussaq 2)

“Taamaalilluni folkehøjskolernerumut ilisarnaqutaavoq najugaqarfigiigalugu nerisaqarfigalugulu ilinniarfimmiinneq, tassani ilinniartut ilinniarnermi avatangiisit immikkut ittut toqqissisimanartullu, sukkulluunniit ikiorserneqarfusinnaasut, siunnersorneqarfusinnaasut ilitsersorneqarfusinnaasullu iluaqutigisarmatigit. Aammattaaq Inatsisartut – folkehøjskolit pillugit inatsisip atuuttup akuersissutigineratigit – apeqqut isummerfigereernikuuaat, tassami tassunga oqaaseqaatini ersippoq, folkehøjskolit ilinniartitsinerat tassaasoq kommunini Piareersarfinni (Majoriani) piginnaangorsarluni ingerlatsinernut assingusunut tapertaasoq.”

(Apeqqut 5-mut Naalakkersuisut akissuteqaataannik tigulaarineq, ilanngussaq 3)

Misilitsissutaasussat pineqartut pillugit oqaatigisarialinnik aningaasartuuteqarnerumissaq Naalakkersuisunit naatsorsuutigineqanngitsoq ataatsimiititaliamit maluginiarneqarpoq. Peqatigisaanik Folkehøjskolit immikkut atuartitsinissamut neqerooruteqarsinnaannerisa Naalakkersuisut oqaaseqarnerat ataatsimiititaliamit nuannaarutigineqarpoq. Taamattorli qulaani akissummi ersarissarneqartumi immikkut oqaaseqaateqarnissaq ataatsimiititaliamit pingaartinneqarsimavoq. Eqqortuunngilaq folkehøjskolit pillugit inatsisip atuuttup akuersissutigineqarnissaa pillugu apeqqummut inatsisartut isummmereersimanerat. Uani apeqqut pineqartoq tassaavoq misilitsissutissat pineqartut ingerlanneqarnissaat siorngatigullu inatsisartunit naliliiffigineqarsimasoq, tassaalluni misilitsissutaasussaasumik atuartitsinerup neqeroorutigineqartarnera, siunertarineqarluni misilitsinnerit pineqartut ingerlanneqarnissaat. Ataatsimiititaliap apeqquteqaataanut Naalakkersuisut akissuteqarniarnerminni eqqumaffigisimanngilaat misilitsinissamut piareersaataasumik atuartitsinerup neqerooritigineqarnera aamma milisitsinnermik ingerlatsineq assigiinngitsuummata. Tamatumani akissuteqaatit sunniutaat annikillisinneqarpoq, paarlattuanilli ataatsimiititaliaq Naalakkersuisunit periarfissinneqarpoq inatsisisamut nassuiaatit annertussusaannik Naalakkersuisut ilisimatissallugit, tamannalu ataatsimiititaliamit nuannaarutigineqarpoq.

6.3 Siunnersuutip aningaasalersorneqarnissaanut aamma ilinniagaqarnerisutit pillugit aalajangersakkat.

Siunnersuutip inatsisitigit kingunerisassai pillugit ataatsimiinnermili ataatsimiititaliamit paasineqarpoq siunnersuutip aningaasatigit allaffissornikkullu kingunerisassai pillugit ersarinnerusumik nassiuasoqartariaqartoq. Pisiaqartitsineq KANOKUKA-p tusarniaanermut akissuteqarnermini eqqaasaata saniatigit siunnersuutip siullermeerneqarnerani oqaatigineqartoq. Tassami siunnersuummi siunertarineqartumi aningaasaqarnerumut pissutsit inatsisitigit taama annertutigisumik allannguuteqassappata, ataatsimiititaliamit pissusissamisoortutut isigineqarpoq siunnersuutip aningaasatigit kingunissarisasaas ersarissumik misissorneqarnissaat siunnersuuteqartup pingaartittariaqaraa.

Aalajangiiffigisassatut siunnersuummi aalajangiinissamut tunngavissat ataatsimut isigalugu soqutiginnittunut, inatsisartunut aammali Naalakkersuisunut ersarissuussasoq sapinngisamik pitsaanerpaamik qulakkeerniartariaqarpoq, taamattumik Naalakkersuisut namminneq piumassutsiminnik paasissutissiinerat ataatsimiititaliamit tikilluaqquneqarpoq.

Aningaasalersuineranut aalajangersakkat aamma allaffissornikkut ingerlanneqarnerisa inatsisikkut oqilisaaffigineqarnissaat siunnersuutikkut kissaatigineqarpoq. Allaffissornikkut killersuineq imaanngilaq neqeroorutinik inatsisitigut aalajangersarneqarsimasunik pitsaassutsimik qulakkeerinneq tamatigut kissaatigineqartoq. Ilinniartunut kommunit akiliuteqartarnerisa peerneqarnerisigut siunnersuummi matumani tamanna ilanngunniarneqarpoq, tassa siunnersuummi imm. 5 tunngavigalugu qitiusumut nuussineq:

5. 14 ima oqaasertalerneqassaaq:

”§ 14. Ilinniartunut § 1, imm. 1-imut ilaasunut, Naalakkersuisut, aningaasanut inatsimmi aningaasaliussatut aalajangersakkat iluanni, folkehøjskolinit ingerlatsineranut tapiissuteqartassapput, ullorsiutit malillugit ukiup ingerlanerani sapaatip-akunnerini ilinniartoqarfinni minnerpaamik 700-ni ilinniartinneqarsimappata.

Imm. 2. Naalakkersuisut taxameteri malillugu tapiisarput, tamatumanilu aallaavigissallugit folkehøjskolimi sapaatip-akunneri ilinniartoqarfiit, akigititamik ukiut tamaasa aningaasanut inatsimmi sapaatip-akunneranut ilinniartoqarfimmuut ataatsimut aalajangiunneqartartumik amerlisarneri.

Imm. 3. Folkehøjskolip sapaatip-akunneri ilinniartoqarfiit imm. 1-imi aalajangiunneqartut amerlassuseqartut ingerlassimanngikkunigit, ingerlatsineranut tapit naleqqiussinikkut utertissavai. Utertillugit akiliutissat ingerlatsineranut tapit tunniunneqarsimasut aalajangersimasumik procentiattut annertussuseqassapput, taannalu aalajangerneqassaaq sapaatip-akunneri ilinniartoqarfiit imm. 1-imi minnerpaaffissaat eqqaaneqartut naapertorlugit ingerlanneqarsimanngitsut procentinngornerat naapertorlugu.


Naalakkersuisut taxameteri malillugu tapiissutit tunniunneqartarnerat allatigullu allaffissornikkut ingerlannerat pillugit malittarisassanik aalajangersaasinnaapput.

Imm. 4. Ilinniartunit, folkehøjskolit ilinniartunut tapisissutisissutigisartagaannit, nammineq akiliuteqarnissaq piumasarineqarsinnaanngilaq.

Taamaalilluni siunnersuutip imm. 5-ani eqqunneqarpoq, suliat aallaavigalugit taxameter atorlugu tapeeriaaseq (atuineq naapertorlugu akiliuteqarneq) aamma suliasat minnerpaaffissaminiinnissaasa naatsorsuutigineqarneri tunngavialugit ingerlatsineranut tapeeriaaseq.

Ingerlatsinermut tapiissutitut piumasagaatit ersarissumik ajornannginnerulissapput, tassami pisut ataasiakkaarlugit sivisussusaat, amerlassusaat il.il. peerneqartussaammata. Tassunga paarlaallugu siunnersuutigineqarpoq sapaatip akunnerini ilinniartoqarfinni minnerpaanik 700 ilinniartinneqarnissaat. Inatsisartut inaatsisaat nr, 24, 18. november 2010-meersuni § 14, imm. 2. takuuk tamanna ukiumut ilinniartumut ataatsimut sap. ak. 36-nik naleqarpoq. Taamaalillunu sapaatip akunnerini ilinniartoqarfinni minnerpaanik 700 ilinniartinneqarnissaq folkehøjskolit pillugit inatsimmi § 14. imm, 1 nr. 4 tunngavigalugu sapaatip akunnerini ilinniartoqarfinni 20-nik ilinniartinneqarnissanik ikinnerulissallutik. (Folkehøjskolit pillugit inatsimmi § 14, imm. 1, nr. 4).

Ataatsimut isigalugu taxameter naapertorlugu tapiissuteqartarnermut naatsorsuutigineqarpoq ilinniartut qaasiuneri naapertorlugit folkehøjskolinut tapiissutit ilaat naatsorsorneqartalissappata folkehøjskolit iliniartunik amerlanerusumik tiguisarnissamut piunassuseqarnerulernissaat naatsorsuutigineqartussanngussalluni. Tamanna ersarissumik Naalakkersuisunit takusassiarineqarsimavoq, takuuk ataani takussutissiaq. Maannakkumut atuisutut akiliutip tapiissutaannginnera pissutaalluni isertitaq tammana takussutissiami takuneqarsinnaanngilaq. Taamaattumik takussutissiaq ataaniittoq folkehøjskolit isertitaanik tamakkiisumik takutissiinerunngilaq.



(Takuuk Naalakkersuisuts aningaasaqarneq pillugu takussutissiaat – ilanngussaq 1.)

Taxameter atorlugu tapiisarnermi ajoqutaasinnaasoq tassaavoq højskolip attanneqarnissaanut kiisalu højskolimi atuarnermi pitsaassutsimit pingaarnersinneqassammat ilinniartut amerlanerusut tiguneqartalernissaat attatiinnartarnissaallu.

Tapeeriaatsinut taakkununga marlunnut tapissutip annertussusaa nalimmassarneqarsinnaavoq. Periuseq taamanna Naalakkersuisut paasissutissiisutaanni ersarissumik nassuiarneqarpoq. Tak. ilanngussaq 3.

Taamaalillugu taxameter atorlugu tapiissuteqartarnermi ilinniartut amerlassusaat tunngavigalugu tapiissutit nalimmassarneqartalissapput. Tapiissutinik nalimmassaanermi ilinniartut amerlassusaat inatsimmi aalajangersakkani allassimanngilaq, tamaattorli tamanna pillugu Naalakkersuisut aalajangersaasinnaapput. Tak. siunnersuummi imm. 5, § 14, imm. 3. Folkehøjskoli pineqartoq naatsorsuutigineqartumik annikinnerusumik suliaqarsimappat taxameter atorlugu tapiissutit ikilisinneqassapput. Paarlattuanillu suliarineqartut amerlaneruppata taxameter atorlugu tapiissutit amerlanerussapput.

Sapaatip akunnerini ilinniartoqarfinni minnerpaanik 700 ilinniartinneqarnissamik piumasarineqartunit suliat ikinnerusimappata taamaallaat ingerlatsinermut tapiissutit ikilisinneqarsinnaapput. Suliaqarnerunerneq imaangilaq tapiissutit amerlanerulerneranik kinguneqartoq taamatuttaarlu tapissutit aatsaat ikilisinneqarsinnaallutik suliaqartoqarsimannginneratigut. Ingerlatsinermut tapiissutit¹, annikillisinneqarnissaanut piunasaqaatit attanneqarnissaat tunngavigalugit ukiumut 200-nik qinnuteqartoqartassappat folkehøjskolit taamatut tapiissutinik annikillisaaffigineqarnissaat erngumanartoqartutut isikkoqanngilaq. Taamaattorli folkehøjskolit ilinniartunik naammattunik tigusaqartarnissaminnut eqqumaffiginninnissaat piunasaqaataavoq.

Soorlu Naalakkersuisut ersarissumik arlaleriarlutillu erseqqissaraat, tapeeriaaseq nutaaq atorneqalerpat apeqqutaassaaq folkehøjskolit periarfissanik qanoq atuisinnaanerit, takukkit siunnesuummi imm. 1. kiisalu ingerlatsinermut aamma taxameter atorlugu tapeeriaaseq. Tapiissutit ukiut tamaasa aningaasanut inatsisitigut aalajangersarneqartassapput, takuuk siunnersuummi imm. 5. Taamaattorli siunnersuummi matumani tunngavigineqartutut tapiissutit pineqartut annikillilerneqarnissaanni aamma annertusineqarnissaanni isumasioqatigiissimaneq tunngavigalugu ataatsimiititaliap ilimagisaatut siunnersuummi matumani suna tunngavigineqartoq folkehøjskolit ilisimavaat.

¹ Takukkit inatsisissatut siunnersuummi nassuiaatit nalinnigiaasut imm. 1.

Folkehøjskolimi ilinniartut qaammammumt ilinniagaqarnerisutaannut tunngatillugu ima siunnersuuteqartoqarpoq:

6. 20, ima oqaasertalerneqassaaq:

”§ 20. Ilinniartut § 1-imut ilaasut, tapiiffigineqarsinnaasumik minnerpaamik sapaatip-akunnerini 10-ni folkehøjskoliniittut, ilinniagaqarnerisqaarneq pillugu nalunaarummi aalajangersakkat naapertorlugit ilinniagaqarnerisqaassapput. Taamaattoq taamaallaat ilinniagaqarnerisat tassaasinnaapput ilinniarnerp aallartinnerani, unitsinnerani, tamatumunnga ilanngullugu ilinniartup qanigisaani pinartumik napparsimasoqartillugu toqusoqartilluguluunniit, ilinniarnerpullu naammassinnerani akiliunneqarluni angalanerit, kiisalu folkehøjskolernermut immikkut aalajangiussamik ilinniagaqarnerisartitat nerisaqarnermut ineqarnermullu ilanngaanneqartut.”

Siunnersuummut aningaasatigut aningaasatigut takussutissiaq najoqqutaralugu Naalakkersuisut ilanngussa 3-mi paasisutissiineranni takuneqarsinnaavoq, naatsorsuutigineqartoq folkehøjskolinut qaammammumt immikkut tapiissutit 4.035 kr.-ussasut. Taamatut naatsorsutiginnineq nammineq akiliuteqartarnermik maanna 365 kr-usumik tunngaveqarpoq, taakkunannga ilinniartup nammineq akilertarlugu sapaatip akunneranut 25%, - 75% sinneruttut kommunimit tapiissutigineqartarput. Toqqaannartumik nammineq akiliuteqartarneq atorunnaassammat aningaasartuutaasartut taakku ullumikkut qaammannut tapiissutigineqartartunit ikinnerisunik qaammammumt immikkut tapiissutininik matussuserneqartassapput². Folkehøjskolinut immikkut tapiissutininik ilinniartut tamarmik nerisaqarnermut aamma ineqarnermut ilanngaafigineqartassapput. Tamanna pillugu ataatsimiititaliaq ima apeqquteqarpoq:

”7. Ilinniagaqarnerisutit, tamatumunnga ilanngullugit qaammammumt ilinniagaqarnerisutit, ilinniartup/atuartup piumasagaatinik naammassinnissimanerani tunniunneqartartuusooq inuttullu tapiissutaasooq Naalakkersuisunit isumaqatigineqarpa?

Taamaattoqassappat: Ilinniagaqartoq nerisaqarnermut/ineqarnermut tapiissutininik pissarsisannigippat imaluunniit pissarsisarpat Naalakkersuisut siunnersuutaat malillugu ilinniartut tamarmik nerisaqarnermut/ineqarnermut inuttut ilanngaanneqartassasumik qanoq ataqatigiissinneqarsinnaava?

² Takuuk ilinniartunut ataatsimut ukiumut naatsorsuutit ilanng. 1-mi qupp. 6. Taamaattorli tamatumunnga atatillugu maluginiarneqarpoq, ilinniartut maammakkumut sap. Ak. Aningaasartuutaat 91 kr.-usooq ataatsimut aningaasartuutissatut 3.285 kr.-mut naatsorsorneqarsimammat. Aningaasat taakku amerlassusaat imaanniartussaavoq, maannakkut ilinniartumut sap. ak. aningaasartuutit 91 kr./sap. ak. 36-ni katillugit 3.276 kr.-ussammata.

Ataatsimiititaliamit ajuusarutigalugu paasineqarpoq, Naalakkersuisut ataatsimiititaliap apeqqutaanut nr. 7-mut akissuteqarnissamut pissutissarsisimangimmata. Taamaattorli apeqqut 7-mut atatillugu ima Naalakkersuisut akissuteqarsimapput:

”Akissut:

Folkehøjskolini ilinniarnermi atukkat ilinniarnermi atukkanit allanit allaanerussutigaat, ilinniartut ilinniartitsisullu ilinniartitsinerinnarmit imminnut ilisarilersannginnerat, aammali ulluinnarni pisartut allat aqqutigalugit ilisareqatigiilersarlutik, tassami ilinniarfimmi najugaqatigiillutillu nereqatigiittarput ataatsimoorussamillu ulluinnarisqaarlutik, immikkut illuinnartumik ilinniarnermi avatangiiseqalersitsiffiusumik. Taamaalilluni folkehøjskolimut taamatut najugaqarfigiitigalugu nerisaqarfigiitalugulu ilinniarneq ilisarnaqutaavoq, ilinniarnermi avatangiisit immikkut ittut akunnerni 24-ni perorsaaniikkut isumaassuiffiusut iluaqtigisarlugit.

*Folkehøjskolit pillugit Inatsisartut inatsisaannut atuuttumut oqaaseqaatini takuneqarsinnaasutut, najugaqarfigiitigalugu nerisarfigalugulu ilinniarfiuneq, tassaavoq folkehøjskolit nalissaqanngitsumik ilinniarnermi avatangiisaannut pissutaasut pingaarnert ilaat. Folkehøjskolillu oqalliseqatigiinnernut atatillugu isumaqatigiissutigineqarpoq, taamatut immikkut ittumik ilinniarnermi avatangiiseqarneq malittarisassat tapersissagaat, taamaalillunilu folkehøjskolini ilinniartitsineranut ilaassasut nerisaqarneq najugaqarnerlu – nalinginnaasumik ilinniarfiit akerliannik, tamaanimi ilinniartut ilinniarfitsik ilinniartitsineq naaniariartoq qimattarpaat. **Taamaalilluni folkehøjskolerneq ataatsimoortutut isigisassaavoq, tamatumunnga ilaallutik nerisaqarneq najugaqarnerlu, taakkulu qaammammut stidepdianit ilanngaanneqartarput.**”*

(Ataatsimiititaliamit erseqqissaaneq)

Folkehøjskolimi ilinniartuuneq taamaalillugu Naalakkersuisunit “ataatsimoortutut” isigineqarpoq, ilinniartut folkehøjskolimi nerisaqarnerat najugaqarnerallu apeqqutaatinnagit ilinniarneq nerisaqarneq najugaqarnerlu tassunga ilanngunneqarput. Knud Rasmussenip Højskolianit tusarniaanermut akissuteqaatini ilinniartut taakkorpiaat folkehøjskoli najugaqanngitsut apeqqutigineqarput. Pissutsinik taakkunanga ataatsimiititaliap misissuineranut atatillugu Naalakkersuisut ilanngussaq 3-mi paasissutissiissutigaat Sulisartut Højskoliani najugaqarnissaq piumasqaataasoq. Taamaattorli Knud Rasmussenip Højskolianut tunngatillugu Qeqqata Kommunia Naalakkersuisunut ilisimatitsivoq ukiumut ilinniartut marluk semesteri ataaseq højskolimi ilinniarnissaannut akuerineqartartut naatsorsuutigineqartorlu højskolimi nagunaqarsimanissaat. Paasissutissap kingulliup

qularnarnera tunngavigalugu ilinniartut tapiiffigineqartartut højskolimi najugaqartanninnerannut uppersaataasut ataatsimiititaliamit upperiuminaatsinneqarpoq. Peqatigisaanillu ilinniartut illoqarfinni allaneersut folkehøjskolimi atuarnermi ilumut folkkehøjskolini najugaqartarnersut ataatsimiititaliamit qulakkeerlugu uppersineqarsimangilaq.

Naalackersuisut folkehøjskolimi ilinniarneq ataatsimoortut isigimassuk, ilinniartunut højskolimi najugaqaratillu nerisaqanngitsunut tapiissuteqartarnerup annikillisinneqarnera siunnersuummut nalinginnaasunik nassuiaatini im. 6-mi Naalackersuisut ilisimatitsissutaata paarlattuanik folkehøjskolimi ilinniagaqartunut sunniuteqartussat isumaqassaaq. Atuisutulli akiliuteqartarneq ullumikkut ingerlanneqartoq ilinniartut qaammammusiaasa tunniunneqannginnera ilanngaatineqareertassaaq. Tassa uani eqqartorneqanngilaq ilinniartunut aningaasannarnissamut periarfissaaq, - tamannami ilinniarnissamut qinnuteqartartut amerlassusaat eqqarsaatigalugit pisariaqarsorinangilaq.

7. Siunnersuummut aningaasatigut kingunissartinneqartut

Ilanngussaaq 1-mi nassuiaateqarnerit saniatigut siunnersuutip piviusunnortinneqarnerani aningaasatigut kingunissartinneqartut siunnersuummut nalinginnaasunik nassuiaatini ilanngunneqarsimapput. Uani oqaatigissallugu pingaaruteqarpoq siunnersuummut aningaasatigut kingunissartinneqartut nalilersorneqartarnerini apeqqutaassasoq folkehøjskolini suliaqarneq, tassungalugu ilanngullugu qassinik ilinniartoqarneq, takuuk aningaasanut inatsimmi konto pingarneq 40.92.10 Folkehøjskolit, 2017-mi højskolit taakku marluk katillugit pissarsiarisimavaat 12.229.000 kr. Ukiumut ilinniartoq ataaseq akeqarluni 305.725 kr. Naatsorsuutigineqarpoq folkehøjskolip ataatsip ukiumut ilinniartut qulinik ilappagit, taamaalillutik ukiumut ilinniartut 30-nngorlugu tamanna ataasiakkaanut ima aningaasartuutaaanikinnerutigissaaq 223.333 kr. Folkehøjskolimut ataatsimut ukiumut ilinniartut katillugit 50-60-inngorlugit ilasineq 162.727 kr.-nik naleqartussat naatsorsuutigineqarpoq. Takussutissarli kingulleq højskolit marluullutik iluarsaanneqarneranik piunnaqatitaqarpoq. KRH-mut atatillugu naatsorsuutigineqarpoq januar 2018-mi iluarsaassineq naammassineqassasoq. Kisiannili Sulisartut Højskolianut atatillugu, tassani sulii iluarsaassinissamut aningaaliissutissat suliarineqarput. Taamaalillugu ataatsimiititaliamit paasineqarpoq, ilinniartunik 110-nik ilinniartoqarluni suliaqarnissaaq sulii ungasittorujussuusooq.

Aningaasalersueriaatsip allannortinneqarnerani naatsorsuutigineqarpoq kommuninut, folkehøjskolinut kiisalu Namminersorlutik Oqartussanut allaffissornikkut sulii oqilisaassinerusussat, tassami tapiisarnermi kommunit suleqataajunnaartussaammata.

Ilinniartunik 110-nik ilimagineqartutut sullissinissap annertussusaa kiisalu ingerlatsinermut tapiissutit 4 mio. kr.-usut nunatta karsianut 5.371.000 kr.-nik aningaasartuutaanerulertussatut naatsorsuutigineqarput. Taakkulu ugguuna aningaasalersorniarneqarput:

- Tapiissuteqarnissamut pisussaaffiup atorunnaarnera pissutaalluni Kommuninut tapiissutit ikilisinneqarnerisigut
- Ilinniartut qaammammut ilinniarnersiutaasa eqqaaneqartut annikillisinneqarnerisigut
- Konto pingaarneq 20.11.70-miit nuussineq, suliniutinut nutaanut sillimmatit.

Konto pingaarneq 20.11.70-miittut suliniutinut allanut aalajangersimasunut atugassiissutaariinnginersut qulakkeerniarlugu apeqqutit arlallit ataatsimiititaliamit nassiunneqarsimapput (takuuk ilanng. 2). Tamatumunnga atatillugu Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq paasissutissiivoq, taakku sillimmataammata pingaarnersiuiinermi aalajangersimasunut suli atugassiissutigineqanngitsut. Peqatigisaanilli ataatsimiititaliamit paasineqarpoq siunnersuutip tusarniutigineqarneranut atatillugu Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoqarfik akisuteqaammini ima allassimasoq:

*”Pisortanut aningaasaqarnikkut allaffissornikkullu kingunissaritinneqartut”
qupperne 10-mi – maannakkut inuusuttunut suliniutinut 3.070.000 kr.
Inuussutissarsiornermut, Suliffeqarnermut, Niuernermut Nukissiuuteqarnermullu
Naalakkersuisoqarfimmit erseqqissaatigineqassaaq aningaasat tamarmik
Naalakkersuisoqarfimmi sinaakkutissanit nassaarineqassammata, aammalu
inuusuttunut suliniutinut sinneqartoorutaanngimmata.”*

(Nutserneqarnera Inatsisartut allatseqarfianit akisussaaffigineqassanngilaq,
Naalakkersuisoqarfimmit danskisuinnaq nassiunneqarsimammata).


Aningaasat taakku atorneqarsinnaanerininik imaluunnii atorneqarsinnaannginnerininik Naalakkersuisut akornanni assigiinngitsumik paasinnittoqartoq ataatsimiititaliamit paasineqarpoq. Tamanna tunngavigalugu ataatsimiititaliamit inassutigineqassaaq siunnersuut manna inatsisitigut ersernerluttoqarnera pissutaalluni suliassanngortinneqassasoq.

Siunnersuutip aningaasalersorneqarnissaanut aalajannersakkat ataasiakkat aamma ilinniartuunersiuteqartarneq pillugit atatsimiititaliap oqaaseqqaatanut inassutigineqassaaq isumaliutissiisummi imm. 6.3 takoqqullugu.

8. Ataatsimiititaliap inassuteqaatai

Ataatsimiititaliap **isumaqatigiittup** siunnersuutip **akuersissutigineqarnissaa** inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.




Mimi Karlsen
Siulittaasoq



Vivian Motzfeldt
Siulittaasup tullia



Laura Táunâjik



Peter Olsen



Henrik Fleischer



Kultureqarnermut, Ilinniartitaanermut, Ilisimatusarnermut
Ilageeqarnermullu Ataatsimiititaliaq
Demokraatit
Atassut

Ilanngussaq 0 1

**Siunnersuutip UPA 2017/127-ip aningaasaqarnikkut
kingunerisassai: Folkehøjskolit pillugit Inatsisartut inatsisaata
allanngortinneqarnissaanut siunnersuut.**

10-05-2017
Sagsnr. 2016 - 6765
Dok. nr. 5316031

Postboks 1029
3900 Nuuk
Tlf: +299 34 50 00
Fax: +299 32 20 73
Email: iiknn@nanoq.gl
www.nanoq.gl

Ataatsimiititaliap uangalu akunnitsinni ilisimatitsiviusumik ataatsimiinnitsinni ulloq 27. april kissaatitut oqaatigineqarpoq siunnersuummi ilaasup tapiissuteqartarnermik aaqjissuussinerup kingunerisassai itisilerutaasumik nassuiaateqarfigineqassasut kissaatigineqartoq.

Siunnersuutip siullermeerneqanerani ulloq 28. april aamma oqaaseqartoqarpoq tapiissuteqartarnermik aaqjissuussineq pillugu, tamatumani aamma aalajangersakkamut ingerlatsinermut tapiissutit naapertuuttumik utertinneqartassasut, folkehøjskolip sapaatip akunneri atuartitsiviusussat siunnersuummi § 14, imm. 1-imut naapertuuttumik ingerlassimangippagit.

Tamanna tunuliaqutaralugu pissusissamisooritissimavara ataatsimiititaliamut aamma partiinut ataatsimiititaliami sinniisoqanngitsunut itisilerutaasunik tapiissuteqartarnermik aaqjissuussineq tamatumalu kingunerisassai pillugit nassuiaateqarfigissallugit.

Siunnersuut imaqarpoq aaqjissuussinermik nutaamik folkehøjskolinut tapiissuteqartarnermi aammalu folkehøjskolini najugaqartarnermut. Tamanna aalajangersagaavoq siunnersuummi imm. 5-imi § 14-ip (tapiissutit) aamma imm. 6-ip oqaasertalersugaaneranut tunngatillugu, § 20-ip oqaasertalersugaaneranut tunngatillugu (højskolini peqataanikkut najugaqarnermut tunngasoq). Immikkoortut taakkua marluk imminnut atassuteqarput, kisiannili paasiuminarsaatitut tulliuttuni immikkoortillugit sammineqassallutik.

Tunuliaqutaasoq aamma siunertaq:

Siunnersuummut oqaaseqaatini immikkoortumi 1.1.-imi nalunaarneqarpoq siunnersuut pingaarnertut siunertaqartoq kalaallini ilinniarfiit atorneqarnerisa tamakkiisunngortinniarneqarnissaannik, kalaallini folkehøjskolit pitsaannerusumik iluaqtigineqarnerisigut.

Tassanilu aamma nalunaarneqarpoq folkehøjskolit aamma namminneq kissaatitut oqaatigisimagaat suli annertunerusumik inuiaqatigiinni ilinniarsimassutsip kivinneqarnissaani akuutinneqarnissartik kissaatigineqartoq.

Siunnersuummut oqaaseqaatini immikkoortumi 1.2-mi nalunaarneqarpoq højskolini arlariiusuni ilinniarnarlutik qinnuteqartartut 200 sinnerlugit amerlassuseqartartut, kisiannili højskolit tamarmik immikkut ukiumut 20-inik taamaallaat atuartoqartartut,

tamatumalu kingunerisaanik pilersaaruteqartoqartoq allilerinissamut iluarsaanikkut imaluunniit nutaanik sanaartornikkut.

Tassanilu aamma nalunaarneqarpoq aprili qaammat 2016-imi seminareqarnermi ilaatigut højskolit kommunillu peqataaffigisaanni oqaluuserineqartoq qanoq aaqqissuussinikkut inatsisiliorneq aamma ingerlatsineq isiginiaassanersut allaffissornerup annikinnerutinnissaanik, malittarisassanik pineqartunik atuinermi.

Kiisalu seminareqarnermi aamma inassutigineqarpoq inissianik pioreersunik annertunerusumik iluaquteqarnissaq aqutissiuukkumallugu, aammalu ilutigisaanik pissusissamisoortumik Namminersorlutik Oqartussat aningaasaliissutaat ingerlatalu ataqatigiissinniarlugit sulissutigineqassasoq tunngaviusumik tapiissutit aamma ilinniartunut atatillugu sapaatip akunnikkaartumik taxameteri atorlugit tapiissuteqartalernissaq aqutissiuunneqassasoq, taamatullu aaqqissuussineq folkehøjskolinut kajumissaataassasoq ilinniartussaminnik tiguisarnerminni annertusaanissaannut.

Tamatumalu saniatigut seminareqarnermi isumaqatigiissutaavoq pissusissamisuussasoq højskolernernut atuisutut akiliutip atorunnaarsinneqarnissaa, taxameteri atorlugu aaqqissuussiviusuni, kommunillu ilinniartut akiliuteqartinneqartarneranni peqataatinneqarnerat atorunnaartariaqartoq.

Tunuliaqutaasut aamma siunertaasut taamaasilluni eqikkarneqarsinnaapput ukununga pingaarnertut isiginiagassanut:

- Højskolit inuiaqatigiinni annertunerusumik iluaqutigineqarneri
- Højskolit ingerlatsisinnaassusiinik pitsaanerusumik iluaquteqarneq
- Allaffissornermik aamma atuisunut akiliuteqartitsisarnermik pisariillisaaneq.

Siunnersuut suliaavoq inassuteqaataasunut naapertuuttumik, siumoortumillu tusarniaasoqarlunilu aamma pisortatigoortumik folkehøjskolinut kommuninullu tusarniaasoqarpoq, taakkunaniillu siunnersuummut ilaliisoqarluni.

Kingunerisassai

Siunnersuutip kingunerisassaani pissutsit assigiinngitsut apeqqutaassapput.

Siullertut apeqqutaassaaq folkehøjskolit qanoq annertutigisumik periarfissanik pinngortunik ingerlatassanillu allanik iluaquteqarsinnaanerat siunnersuutikkut ammaanpeqartunik. Tamatumani ilaavoq siunnersuummi immikkoortumut 1-imut erseqqissaaneq, § 1, imm. 1, oqaaseqatigiit aappaannut tunngatillugu. Erseqqissaanikkut ersarinnerulersinneqarpoq højskolit tamanut ilisimasariaqartunik atuartitsinerat aallaaveqarsinnaasoq fagini aamma sammisani nalinginnaasumik atuagarsorluni ilinniartitaanermi aaqqissuussinerit avataanniittunik. Taamaasillunilu aalajangersakkami erseqqissarneqarpoq tamatumani sammineqarsinnaasut ilagigaat timersorneq, nerisassiorneq imaluunniit sannavinni fagit sammineqartartut.

Aappaattullu siunnersuummi højskolit periarfissinneqarput meeqqat atuarianni inaarutaasumik misilitsittarnermik ingerlatsisarsinnaasut. Taamatut aaqqissuussissagaanni piumasaqaataavoq ilinniarfimmik imaluunniit pisortanut

suleqatigiinnissamut isumaqatigiissuteqartoqarsimanissaa, ilinniartitaanernik pineqartunik neqerooruteqartartuusunut.

Pingajuattut siunnersuummi højskolit periarfissinneqarput ilinniartitaanernik allanik neqerooruteqarsinnaasut taamaattunik ingerlatsisuusartunut ilinniarfennut isumaqatigiissuteqarnikkut.

Tamatuma saniatigut tapiissuteqarnermik aaqqissuussineq nutaaq qanoq kinguneqassanersoq eqqarsaatigalugu pissutsit arlallit apeqqutaassapput. Siullertut akiliutissat annertussutsit qanoq annertutigisut ingerlatsinermut tapiissutitut aamma taxameteri atorlugu tapiissutitut aningaasanut inatsimmi aalajangiunneqartassanersut. Aappaattut højskolit ilinniartunik qassinik tiguisassanersut. Kiisalu ilinniagaqarnersiutisiassat qanoq annertutigisut højskolini ilinniartunut højskolini tapiissuteqarfiusartuniittunut aalajangersarneqassanersut.

Soorluli siunnersummut oqaaseqaatini ersarissumik nalunaarneqartoq siunnersuutip aningaasatigut kingunerisassai tunngaviusussanik aalajangersimasunik aallaaveqarput. Tapiissutissat annertussuserisagassaat ilinniagaqarnersiutisiassallu namminneq siunnersuummi aalajangersarneqanngillat, kisiannili aningaasanut inatsimmi aalajangerneqartassallutik, taamaasillutillu ukiumiit ukiumut allanngortinneqarsinnaallutik, aningaasanut inatsisip akuersissutigineqarnerani.

Tulliuttuni nassuiarneqassapput siunertat pingaarnerit tapiissuteqarnermik aaqqissuussinermi nutaami. Tamatumunngalu ilaliullugu tulliullugulu aaqqissuussinerup kingunerisassai suliami akuusunut nassuiarneqassapput, tassalu højskolinut, kommuninut, ilinniartunut, Namminersorlutik Oqartussanut aammalu inuiaqatigiinnut ataatsimut isigisumik. Tamanna pissaaq oqaasertatigut aammalu graafit atorlugit.

Tapiissuteqartarnermik aaqqissuussinermi nutaami siunertat pingaarnerit:

- 1) Pitsaanerumik iluaquteqarnissamut kajumissaatit
- 2) Højskolinut aningaasalersuinissamut annerusumik qularnaarineq
- 3) Højskolit aningaasaqarnerat pitsaanerusoq
- 4) Ilinniartukkaartumik aningaasartuutit appasinnerusut
- 5) Ilinniartunut atugassarititaasut pitsaanerusut
- 6) Kommuninut aamma Namminersorlutik Oqartussanut allaffissorneq annikinnerusoq
- 7) Højskolinut allaffissorneq annikinnerusoq.

Kingunerisassai:

1) Højskolini

Ingerlatanut piumasaqaatit:

Maannamut ingerlatat annikinnerpaaffissalerlugit aalajangersaasoqarpoq, højskolit tapiissutisisinnaanissaannut naammassineqarsimasussanik. Maannamut piumasaqaataasimavoq minnerpaamik ukiumut ilinniartut 20-iussasut, ilinniartitsinermi tapiissutisissutaasinnaasumi. Kiisalu højskolimi atuartitsinernik sapaatip akunnerinik 36 - inik sivissuseqartunik tapiiffigineqarsinnaasunik ingerlatsisoqassaaq, atuartitsinerlu aaqqissuunneqassaaq højskolernertut annerpaamik marluttut, højskolernerillu tamarmik minnerpaamik sapaatip akunnerinik 13-inik sivissuseqassallutik.

Siunnersuummi piunasaqaatit taakkua allanngortinneqarput taamaallaat piunasaqaatinngorlugu ullorsiuutit ukiuanni atuartsisoqassasoq minnerpaamik ilinniartunut hold-imi sapaatip akunnerini 700-ni. Taamaasilluni nammineq pingaarutaaruppoq højskolernerit qassit pineqarnersut, højskolernerillu ataasiakkaat qanoq sivisussuseqartarnersut. Tamatumalu taamaasilluni højskolit eqaannerusumik højskolertitsinerit aaqqissuunnissaannut periarfissaqartilerpaat. Sapaatip akunneri 700-it hold-imi ingerlanneqartartut aamma assigikannerpaat ukiumut ilinniartut 20-it missaat, minnerpaaffissanut piunasaqaatit allannguuteqanngitsut iluanni.

Ukiumi ataatsimi ilinniartuq tassaavoq ilinniartuq ataaseq ukiup ataatsip iluani sapaatip akunnerini 36-ni.

Ilinniartuq hold-imi sapaatip akunnera paasineqassaaq ilinniartuq ataaseq sapaatip akunnerani ataatsimi.


Ilinniartumut sapaatip akunneri 36-it hold-imiinneq, aamma tassaavoq ilinniartuq ataaseq ukiumi ataatsimi.

Tapiissutit aalajangersimasut aamma allanngorartut:

Maannamut taamaallaat tapiissuteqariaaseq ataasiinnaasimavoq. Taakkualu tassaasimallutik aalajangersimasumik tapiissutit, ingerlatsinermut tapiissutit isigineqartut. Tamatumali saniatigut peqataasumut akiliummik aamma ilaqarsimavoq, taakkualu tunngavigalugit ilaatigut højskolit isertitassaanni ingerlatsinermi kisitsisit aalajangiisooqataallutik, tassalu ilinniartut amerlassusiat. Kisiannili peqataasunut akiliut appasissorujussuusimammat tamatuma kingunerisimavaa højskolinut akilersinnaanngitsoq minnerpaamik piunasaqaataasut sinnerlugit peqataasoqarnissaq. Taamaasillunilu maanna aaqqissuussineq atuuttusoq qiimmassaatitaqanngilaq ilinniartunik amerlanerusunik tiguisinnaanermut. Tamannalu højskolinut akornutaasimavoq ingerlatat annertusisarnerisigut højskolinut aningaasaqarneq pitsaannerusog pilersinneqarsinnaasimanngimmat. Ilutigisaanillu qaffasissorujussuarnik ataatsimoortumut aningaasartuuteqarsimalluni, aningaasartuutit ilinniartukkaartumik isiginiaraanni.

Siunnersuummi ilaapput tapiissutit aalajangersimasut (ingerlatsinermut tapiissutit) aamma tapiissutit allanngorartut (taxamaterimut tapiissutit). Tamatuma kinguneraa qularnaarneqassammat ingerlatsinermut aalajangersimasunik tapiissutisinnissaq, ingerlatat kisitsisitaat apeqqutaatinngit, ingerlatassanut minnerpaaffissatut piunasaqaatit naammassineqarsimappata. Tamatumalu ilutigisaanik kingunerissavaa højskolit aningaasaqarnikkut ingerlataminnik annertusaanikkut pitsaannerusumik tunngavissaqarnissaat, ilinniartukkaartumik taxameteri naapertorlugu tapiissutisiassat naammattumik qaffasissuseqarsimappata.

Taxameteri atorlugu aaqqissuussineq ilinniartitaanerni allatigut aamma atortinneqarpoq. Tamanna assersuutigalugu atuuppoq inuussutissarsiutinut ilinniartitaanerni aamma efterskolini. Ataaniittumi grafimi takutinneqarput tapiissutit maanna aaqqissuussinermi ilinniarfikkaartumik maanna pissutsini atuuttuni, aammalu siunnersuut piviusunnugussappat. Oqaatigineqassaaq ilinniarfiit maanna aaqqissuussinerni aningaasatigut qiimmassarneqanngimmata ilinniartuqarnermikkut annertusaanissaminnut. Soorluli grafimi takutinneqartuq ilinniarfiit amerlanerusunik ilinniartuqarnissamut qiimmassagaassapput siunnersuut piviusunnugussappat.



Naleqqussaaneq aamma tapiissutinik utertitsisarneq:

Malittarisassat maanna atuuttut naapertorlugit tapiissutisisinnaanermut pisinnaatitaaneq atorunnaassaaq paasineqarpat inatsimmi minnerpaaffissanut piunasaqaatit naammassineqarsimangitsut. Tapiissutillu tunniunneqartarmata ingerlatsinissatut naatsorsuutigisat tunngavigalugit, tamanna utertitsinissamik kinguneqarsinnaavoq. Tamatumaa kinguneraa højskolimut minnerpaaffissatut piunasaqaatinik naammassinngitsumut kingunerisinnaammagu aningaasalersuinerit aalajangiisuusut atorunnaarnerat, taamalu aningaasalersorneqarnissamut tunngavissaarunera.

Taamaattoq periarfissaqarpoq malittarisassiornissamut tapiissutit annikillinissaannut ukiumut ilinniartut ikinnerunerisigut aammalu sapaatit akunneri ilinniartitsiviusut naammassineqartut ikinnerunerisigut. Periarfissaq taanna maannamut atorineqarsimangilaq.

Siunnersuutikkut **taxameteri naapertorlugu tapiissuteqartarnissamik** aningaasaliissuteqartarnermut tunngaviusut nalinginnaasut atorlugit ingerlatat tunngavigalugit, taxameteri atorlugu ingerlatsineq aaqqissuunneqarpoq. Tassalu sapaatip akunneri ilinniartut hold-iniiffii. Taxameteri naapertorlugu tapiissutit qaffattarlutillu appartarput procentip annertoqataanik ingerlatsinerit apparneranni qaffannerannilu. Taamaasilluni ullorsiutit ukiuanni ilinniartunut sapaatip akunneri 720-it naammassineqarsimappata, naatsorsuutigisanut sapaatip akunnerinut 800-inut sanilliunneqartussat, ingerlatsinerup appariaataa 10 %-iussaaq, taamalu taxameteri naapertorlugit tapiissutissat 10 %-imik annikillineqassallutik. Sapaatip akunneri 880-it ilinniartut naammassineqarsimappata, tamanna tapiissutit 10 %-imik annertusinerannik kinguneqassaaq. Tamanna pisassaaq naatsorsuinikkut, naammassisat ilisimaneqaleraangata. Tapiissutinullu iluarsiissuteqarneq taamaasilluni pisinnaasassalluni ullorsiutit ukiuannut tullermut tapiissutinik akiliuteqarnermut atatillugu.

Siunnersuut naapertorlugu **ingerlatsinermut tapiissutit** atorunnaartassanngillat, minnerpaamik angusassatut piumasaqaatit naammassineqanngippata. Kisiannili utertitsilluni tapiissutiniit akiliisoqassaaq naammassinngitsuukkanut naapertuuttunik. Aningaasat tapiissutaasut utertinneqartussat ingerlatsinermut tapiissutaasimasuniit procentinngorlugu naatsorsorneqassapput, sapaatip akunnerinut ilinniartoqarfiusussanut naammassinngisanulli minnerpaaffissatut piumasaqaataasunut 700-nut sanilliullugu. Tamanna siullertut isumaqarpoq ingerlatsinermut tapiissutit taamaallaat atorunnaassasut tamakkiisumik ingerlatsisoqarsimanngilluinnarpat. Aappaattullu isumaqarpoq ilaannakuusumik utertitsisoqartussaasoq sapaatip akunnikkaartunik ilinniartoqarfiusut 700-it ataallugit annertussuseqarpata. Ingerlatsinissatut naatsorsuutigisaaq sapaatip akunneriniit ilinniartoqarfiusuniit 800-niit sapaatip akunnerinut ilinniartoqarfiusunut 720-inut apparpata, taamaasilluni tamanna ingerlatsinermut tapiissutitut sunniuteqassanngilaq. Sapaatip akunneri ilinniartoqarfiusut 800-it apparipata sapaatip akunnerinut ilinniartoqarfiusunut 630-inut taava taamaallaat sapaatip akunneri hold-inik ilinniartoqarfiusut 70-it utertitsinissami tunngaviussapput. Tamatumanilu pisumi piviusunngortinneqartut sapaatip akunnerinik 70-inik minnerpaaffissatut piumasarineqartumiiit appasinnerummata, tamanna taakkua 10 %-eraat, taamalu ingerlatsinermut tapiissutit 10 %-imik annikillineqassallutik, naak pisumi uani ingerlatsineq 20 %-i sinnerlugu apparisimagaluartoq. Tamatuma kinguneraa højskolit killeqartumik aningaasaqarnermikkut eqqorneqartarnissaat, ilinniartut amerlassusissaannut minnerpaaffissatut piumasaqaammik naammassinnginnermi, taamalu aningaasaqarnikkut ingerlatsinerminni tunngavissaminnik ajornartoorutigissanagu. Utertitsisoqarnissaanik piumasaqaataasinnaasoq aaqqiissuteqarfigineqarsinnaavoq tulliani taxameteri atorlugit tapiissutitik akililernermi, ukiumi tullermit tapiissutit akilerneqarnissaanni.

Aningaasaliissutit annertussusaat:

Højskolinut tapiissutit ataatsimut isiginiaraanni apeqqutaapput ingerlatsinermut tapiissutini annertussutit, aamma taxameteri naapertorlugu tapiissutit, aammalu ingerlatsinerni kisitsisit.

Aningaasaliissutit annertussusilerneqarpata siunnersuummut oqaaseqaatini eqqaaneqartut, tamanna højskolinut isumaqassaaq landskarsip tapiissutaasa ullumikkutukanneq annertussuseqarnissaat, ingerlatat 20 %-it missaannik qaffappata. Taamaasillunilu naatsorsuutigineqarpoq ingerlatsineq taamatut annertussusilimmik annertusisinnaassasoq. Ingerlatsineq suli annertusinerorqqissappat tamanna ullumikkornit suli annertunerusunik tapiissutitut aningaasaliissuteqarnermik kinguneqassaaq. Ingerlatsinerlu 50 %-imik qaffariassappat, taamalu ukiumut ilinniartut 20-niit 30-inut qaffallutik højskolini arlariinni, tamanna aningaasaliissutaasut annertuseriarnerannik ullumikkut 12.229.000 kr.-imiit 13.400.000 kr.-inut kinguneqassaaq – tassalu 1,2 mio. kr.-inik annertuseriassallutik. Siunnersuummut oqaaseqaatini nalunaarneqarpoq højskolit iluarsarneqareernerminni naatsorsuutigigaat ukiumut ilinniartunik 50-it aamma 60-it missaannik tamarmik immikkut tigusisinnaalernissartik. Ingerlatsineq taamaasilluni højskolini arlariinni ukiumut ilinniartunut 55-inut qaffassappat aningaasaliissutaasartut tamarmiusut 17.900.000 kr.-inut qaffassapput, tassalu qaffariaat 5.671.000 kr.-iulluni. Tamatumunngalu atatillugu oqaatigineqassaaq siunnersuummut oqaaseqaatini ajuusaarnaraluartumik kukkuneqarmat, allassimagamik 17.600.000 kr.-it, eqqortorli 17.900.000 kr.-iusussaalluni.

Højskolit ingerlatsinerminni kisitsisaataat ilinniartunut sapaatip akunnerinut 700-inut appariassappata, tassalu ilinniartut ukiumut 20-it amerlaqataannut, aningaasaliissutaasut tamarmiusut appariassapput. Kisiannili siuliani eqqaaneqartutut naleqqussaannermut tapiissutinillu utertitsisarnermut immikkoortumi tamanna kinguneqassanngilaq ingerlatsinermut tapiissutisisinnaatitaaneq atorunnaassasoq. Taamaallaat naapertuuttumik annikilliliisoqassaaq.

2) Kommunit

Kommunit højskoliniinnermut aningaasartuutaat maannamut nammineq akiliutaasartut 75 %-erisimavaat. Nammineq akiliutaasartut 365 kr.-inik sapaatip akunneranut annertussuseqarput, taamaattumillu kommunit sapaatip akunneranut ilinniartumut ataatsimut akiliutaat 274 kr.-iulluni, ilinniartullu sinneruttoq 25 %-i, sapaatip akunneranut 91 kr.-i akilertussaallugu.


Siunnersuutikkut nammineq akiliuteqartarneq atorunnaassaaq, tamatumalu kingunerissallugu kommunit aningaasartuutaat atorunnaassasut. Tamannalu kinguneqassaaq kommuninut ataatsimoortumik tapiissutit annikillineqarnissaannik. Annikillissutissap tamatuma annertussusissaanut apeqqutaassapput ingerlatsinermut kisitsisit.

3) Ilinniartut

Ilinniartut, soorlu kommuninut immikkoortumi eqqaaneqareersoq maannamut nammineerluni akiligassap 25 %-ia akilertarpaat, sapaatip akunneranut 91 kr.it.

Ilinniartullu tamatuma ilutigisaanik ilinniagaqarnersiutinik 4.400 kr.-inik qaammammut akilerneqartarput, ilanngakkanik 2.400 kr.-inik, nerisaqarnermut ineqarnermullu akiliutitut.

Siunnersuutikkut nammineq akiliuteqartarneq atorunnaassaaq. Taarsiullugulu siunnersuutaavoq ilinniagaqarnersiutit annikillineqassasut qaammammut 4.035 kr.-inut, ilanngarneqarlutillu 2.400 kr.-inik ineqarnermut nerisaqarnermullu, taamaasillunilu ataatsimut isigaluni ilinniagaqartut ajorseriartoqarneranik misigissanatik. Tamannali aningaasanut inatsimmut tunngasuvoq, taamaattumillu Inatsisartut ukiumiit ukiumut ilinniagaqarnersiutit annertussusissaat allanngortissinnaavaat, ilinniagaqarnermi pisartakkatut allatulli.



4) Namminersorlutik Oqartussat


Namminersorlutik Oqartussat højskolinut aningaasartuutaat piffissami matumani tassaapput tapiissutit aningaasanut inatsimmi kontumi pingaarnermi 40.92.10, Folkehøjskolit. 2017-imut tapiissutit 12.229.000 kr.-inik annertussuseqarput. Pineqarput ingerlatsinermut tapiissutit, akilerneqartartut inatsisini minnerpaamik piumasaqaataasut ingerlatsinissamut naammassineqarsimappata. Tapiissutit annertussusissaat aalajangersimasuupput, taamaasillunilu ingerlatsinerup qanoq inneranik tunngaveqartuunatik.

Tamatuma saniatigut Namminersorlutik Oqartussat ilinniagaqarnersiutinik højskolini ilinniartunut akiliisarput. Qaammammut akiliutaasartut 4.400 kr.-iupput, 2.400 kr.-inillu ilanngarneqartarlutik nerisanut aamma ineqarnermut akiliutissanik. Tamanna isumaqarpoq Namminersorlutik Oqartussat ukiumut ilinniartut 20-it missaannik ingerlatsisoqarnerani (piviusoq tassa 19,4 ukiumut ilinniartut assigalugu ilinniartut sapaatip akunneri hold-ini 700-it), maanna annertussutsit atuuttuusut, aningaasartuutitaqartorlu ukiumut 700.000 kr.-inik. Ilinniagaqarnersiutinut aningaasartuutit naatsorsorneqarput ilinniartunut 18-it sinnerlugit ukiulinnit, højskolini ilinniartuusartut amerlanersaat 18-it sinnerlugit ukioqartuusarmata.

Namminersorlutik Oqartussat ataatsimut ukiumut højskolinut aningaasartuutaat katillugit 13.312.250. kr.-iupput, ilanngutereerlugit Namminersorlutik Oqartussat kommuninut ataatsimoortumik tapiissutitsigut akilertagaat, kommunit nammineq akiliutissanut matussutissaattut, aningaasat 383.250 kr.-inik annertussuseqartut. Kommuninut ataatsimoortumik tapiissutit isiginiangikkaanni, tamanna isumaqarpoq, soorlu aningaasartuutissanut nalunaarsuummi kontumi pingaarnermi 40.92.10, nalunaarneqartutut ataatsimoortumik aningaasartuutit ukiumut ilinniartukkaartumik qaffasingaatsiartut, 305.725 kr.-it ukiumut ilinniartunut 20-qqissaanut (314.460 kr.-it ukiumut ilinniartut hold-ini 19,4 -aaneranni ilinniartut sapaatip akunnerisa 700-it assigisaat.)

Ingerlatsineq annertunerusoq amerlanerusunik ilinniartoqarnikkut, ataatsimoortumik aningaasartuutit annikinnerunerannik kinguneqassaaq. Siunnersuutip nutsaap iluani ilinniartut amerlassusaasa annertuseriarnarat ukiumut ilinniartunut 30-inut, højskolikkaartumik ataatsimoortumik aningaasartuutit appariartissavaat 223.333 kr. - inut. Ilinniartuusartut amerlassusaasa naatsorsuutigineqartutut tiguneqarsinnaasunut illuutiniq iluarsaareernermi højskolini arlariinni 50-60-inut annertuseriartinnerisa, ataatsimoortumik aningaasartuutit appariartissavaat 162.727 kr.-inut.

Tulliuttumiittumi grafimi takutinneqarput aningaasartuutit tamarmiusut ilinniartukkaartumik pissutsit maannakkutut inneranni, aamma siunnersuutip piviusunngortinneqarneratigut. Ataatsimoortumik aningaasartuutit graafimi tassaapput kommuninut ataatsimoortumik tapiissutit ilanngunneqartut maanna pissutsini, taamalu ilinniartukkaartumik aningaasartuutit tamarmiusut.



5) Inuiaqatigiit ataasimut

Soorlu siuliani ersittoq periaaseq (iluseq) siunnersuutigineqartoq tassaassaaq pissuseq illugiilluni ajugaanermik kinguneqartoq – ajugaaneq – ajugaaneq – imatut paasillugu akuusut tamarmik iluaqutissarsivigisassaat.

Højskolit misigissavaat ingerlatsinerup annertunerulersinnissaanut kajumissaat, tassuunakkullu højskolip ingerlanneqarnerani aningaasaqarnikkut pitsaanerusumik inissisimalernissaq. Højskolit tamatuma saniatigut ingerlatat appariarsinnaanerannut eqqorneqarsinnaannginnerussapput, minnerpaaffissallu ataannut peqqajaasinnaaneranut. Kiisalu aamma peqataasut akiliuteqartarnerata atorunnaarnera allaffissornikkut pisariillisaataassaaq.

Kommunillu peqataasut akiliuteqartarnerata atorunnaarnera aamma misigissavaat allaffissornikkut pisariillisaatitut.

Peqataasullu nammineq akiliuteqartarnerata atorunnaarnera aqutissiuussisinnaassaaq qinnuteqartartut amerlanerulernerannut, peqataanermut akiliuteqartarnek nammineq inuit ilaannut aporfissatut misigineqarsinnaammat, aamma naak nammineq akiligassaaq annertunngikkaluartoo.

Namminersorlutik Oqartussanut iluseq una kinguneqassaaq højskolit tiguisinnaassusiata pitsaanerulernissaa naatsorsuutigineqarsinnaassasoq. Tamatumalu kingunerissallugu peqataasumut ataatsimut aningaasartuutit appasinnerulernerit. Ilutigisaanik periarfissaalissaaq qinnuteqartartuniit amerlanerungaatsiartut højskolernissanut tiguneqartalernissaat, tamannalu ataatsimut isigaluni piginnaasanik annertusaataasinnaalluni. Tamannalumi siunnersuummi aaqqissuussinerit sinnerinit ilalersorneqarpoq, taamalu højskolit aamma allanik ingerlataqarsinnaanerulernerannik.

Inussiarnersumik inuulluaqqusillunga
Med venlig hilsen



Doris Jakobsen



Ilinniartitaanermut, Kultureqarnermut,
Ilisimatusarnermut Ilageeqarnermullu
Naalakkersuisoq
IKIIN@nanoq.gl

Ulloq: 16-05-2017
J.nr.:01.39.01.03-00183


UPA2017/127 Folkehøjskolerit pillugit siunnersuummut apeqqutit

Aallaqqaammut Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq folkehøjskolerit aningaasalersorneqarnerani tapiisarnerit qanoq aaqqissuussineri pillugit nassuiaateqarneranut ataatsimiititaliamit qutsavigineqassaaq.

Taamaattorli inatsisissatut siunnersuummi pissutsit arlallit assigiinngitsut suli ataatsimiititaliamit paasisaqarfigineqarusupput, Naalakkersuisorlu qinnuigissallugu apeqqutit ataani allassimasut akissuteqarfigeqqullugit.

Nalinginnaasumik nassuiaatini takuneqarsinnaavoq siunnersuutip matuma pisortanut aningaasatigut kingunissarisagai 2018-mut Inatsisissatut Siunnersuummi aningaasartuutissanik nussuisoqartariaqarneranik. Tamatumunnga ilanngullugu ilisimatitsissutigineqarpoq tamatumunnga atatillugu Naalakkersuisut siunnersuutigissamaaraat 2018-mi aningaasanut inatsisissatut siunnersuummi aningaasat konto pingaarneq 20.11.70-miit, 2017-mi aningaasanut inatsimmi suliniutinut nutaanut sillimmatit, folkehøjskolerit kontuannut pingaarnermut naleqquttumik annertussusilimmik nuussisoqarnissaa. tiguneqarnissaat nassuiaatini takuneqarsinnaavoq naleqquttumik annertussusillit 3.071.000 kr.-nut nalilerneqarsimasut. Tusarniaanermi akissutigineqartunit ataatsimiititaliamit paasineqarpoq tamatumunnga atatillugu Kommune Kujalleq aamma Inuussutissarsiornermut Suliffeqarnermut, Niuernermut Nukissiuteqarnermullu Naalakkersuisoqarfik suut tulleriarinermi tunulliunneqarnissaannik apeqqutinik assigiimmik apeqquteqarsimasut. Taamaallillugu kingulliup ersarissumik erseqqissarpaa pineqartumi tassani aningaasanik sinneqartoorutissaqannginnera. Tusarniaanermut akissutit misissorneqarnerani tulleriarinermi kissaatigineqartut pillugit ersarissumik akissuteqartoqarsimanngitsoq takuneqarsinnaavoq. Taamaaliornikkut tulleriarinermi suliniutinik pilersaarutinillu kingullinngortitsinerit pillugit nassuiaatit amingaatigineqarput.

1. Aningaasanik nikisiterineq akuerineqassappat suunuku suliniutit pilersaarutinillu ingerlatinngiinnassallugit imaluunniit annikillisissallugit Naalakkersuisunit kissaatigineqartut?
2. Konto pingaarneq 20.11.70-mi suliniutigineqartuni pilersaarutigineqartunillu Folkehøjskolerit suliniutaannik soq pingaarnerutitsinerit Naalakkersuisunut nassuiaatigeqquneqarpoq.



INATSISARTUT

3. Aningaasat sumut atorneqarnissaannik siunertaqartoqarsimangippat aningaasat immikkoortinneqarsimasut sumut atorneqartussaagaluernerat naatsorsuutigineqartup paarlattuanik Naalakkersuisut nassuiarsinnaangippassuk sooq taamanikkut konto-mut pineqartumut aningaasaliisoqarnissaa Naalakkersuisut siunnersuutigisimaneeraat nassuiaatigeqquneqarpoq.

Aningaasanut inatsit 2017-mi takuneqarsinnaavoq konto pingaarneq 64.13.23 Majoriaq (Tapiissutitut aningaasaliissutit) 2017-mut Majoriamut (siorngatigut Piareersarfiit) tapiissutitut akuersissutit 72,7 mio kr.-ummata (tassa 2016-miit annertuseriarneq 1,1 mio. kr. kiisalu 2015-mit annertuseriarneq 22,2 mio. kr.). Ullumikkut Majoriaq meeqqat atuarfiani misilitsinnermut neqerooruteqarsinnaanermut piginnaatitaareerpoq.

4. Folkehøjskolit naggataarutaasumik soraarummeernernut aningaasaliiffigineqaaqqinnerannut neqeroorsinnalernissaanut siunertarineqartumi iluaqutissat aamma ajoqutissat pillugit Naalakkersuisut nassuiaateqaaqquneqarput.
 - a. Suna akikinnerussava: I) Folkehøjskolit Majoriamik suleqateqalissapput taamaalillutik folkehøjskolini ilinniartut Majoriami inaarutaasumik misilitsinnaalerlutik? Imaluunniit II) Assigiinnik marlunnik pilersitsisoqassaaq, taamaalillutik meeqqat atuarfiani inaarutaasumik misilitsinnerit Majoriap aamma folkehøjskolit ingerlatilerlugit.
5. Majoriap illoqarfanni pineqartuni inaarutaasumik misilitsinneq tigummippassuk meeqqat atuarfiani inaarutaasumik misilitsinneranik tigumminissamut folkehøjskolit pisinnaatitaanissaat marloqiusamik sulinertut isigineqarsinnaasorinarpoq. Taamatut marloqiusamik suliaqarneq tassungalu atatillugu marloriaammik aningaasalersuineq nunatta karsiani aningaasanik ikereeqisumik atorluaanertut Naalakkersuisunit isigineqarpa?

Folkehøjskolinut pisortat tapiissutaasa ingerlanneqarneri qitiusumut nuunneqarnissaat oqaatigineqarsimasooq. Siunnersuummut imm. 6-mi ima allassimasooqarpoq:

"6. § 20, ima oqaasertalerneqassaaq:

"§ 20. Ilinniartut § 1-imut ilaasut, tapiiffigineqarsinnaasumik minnerpaamik sapaatip akunnerini 10-ni folkehøjskoliniittut, ilinniagaqarnersiaqarneq pillugu nalunaarummi aalajangersakkat naapertorlugit ilinniagaqarnersiaqassapput. Taamaattoq taamaallaat ilinniagaqarnersiat tassaasinnaapput ilinniarnepur aallartinnerani, unitsinnerani, tamatumunnga ilanngullugu ilinniartup qanigisaani pinartumik napparsimasooqartillugu toqusoqartilluguluunniit, ilinniarnepurullu naammassinnerani akiliunneqarluni angalanerit, kiisalu folkehøjskolernermut immikkut aalajangiussamik ilinniagaqarnersiarititit nerisaqarnermut ineqarnermullu ilanngaanneqartut."

Aningaasatigut kingunissartinneqartuni kiisalu ilisimatitsissutitut nassiunneqarsimasumi ilinniagaqarnersutit millisinneqarnissaat kiisalu nerisaqarnermut ineqarnermullu tapiissutit annikillisinneqarnissaattut eqqaaneqarput.



INATSISARTUT

6. Naalackersuisut qaammammut 4.600 kr. tunngavigigaat aamma nerisaqarnermut ineqarnermullu ilanngaassisoqartassasoq, siunnersuummilu matumani 2.600 kr-nik nalilerneqartoq eqqortumik paasinninneruva? (tassa 2.000 kr. tiguneqartassasut).
 - a. Taamaattoqassangippat: *"Folkehøjskolernermut immikkut aalajangiussamik ilinniagaqarnersiaritit"* imatut paasineqassava, tunngaviusumik ilinniagaqarnersiutit qaammammut 4.600 kr.-nit appasinnerussatut? Taamaattoqassappat folkehøjskolimi ilinniagaqartut tunngaviatigut sooq appasinnerusumik ilinniagaqarnersiuteqarnissaat Naalackersuisunut nassuiaateqarfigeqquneqarpoq.

7. Ilinniagaqarnersiutit, tamatumunnga ilanngullugit qaammammut ilinniagaqarnersiutit, ilinniartup/atuartup piumasaqaatinik naammassinnissimanerani tunniunneqartartuusoq inuttullu tapiissutaasoq Naalackersuisunit isumaqatigineqarpa?
 - a. Taamaattoqassappat: Ilinniagaqartoq nerisaqarnermut/ineqarnermut tapiissutinik pissarsisangippat imaluunniit pissarsisarpat Naalackersuisut siunnersuutaat malillugu ilinniartut tamarmik nerisaqarnermut/ineqarnermut inuttut ilanngaanneqartassasumik qanoq ataqatigiissinneqarsinnaava?

8. 2011-miit 2016-mut ukiumut agguaqatigiissillugu ilinniartut qassit folkehøjskolimi najugaqanngikkaluarlutik folkehøjskolimi tapiiffigineqarsinnaasumik atuarsimappat?

9. Ilinniartut tamarmik nerisaqarnermut/ineqarnermut neqeroorfigineqartarnerannik Naalackersuisut ilimaginninnerat ataatsimiititaliamit uppersarneqarsinnaasimangilaq. Piffissami 2011-miit 2016-mut ukiumut agguaqatigiissillugu ilinniartut qassit nerisaqarnermut/ineqarnermut neqeroorfigineqartarsimangitsut Naalackersuisunut nassuiaatigeqquneqarpoq.

10. Siunnersuut una akuersissutigineqassappat ilinniartut illoqarfanni folkehøjskolilinni najugaqartut tamakkiisumik ilinniagaqarnersiutississagunik folkehøjskolinut nuuttariaqarsinnaassappat taamaaliornikkullu inissanik tigusillutik. Nalinginnaasumik oqaaseqaatinni imm. 1.1 naapertorlugu folkehøjskolernissamut kissaateqartut sapinngisamik amerlasuut periarfissaqartinneqarnissaannik siunertamut Naalackersuisut kissaatigisaannut tamanna qanoq naapertuuppa?

Siunnersuummut aningaasatigut kingunissaritinneqartuni aningaasat tunniunneqartut siunnersuutip malittarisassaannut atuutsitsinissaanut qanoq atorneqarsinnaaneri arlalitsigut apeqquserneqarput. Tassunga atatillugu arlaleriarlutik Naalackersuisut nassuiarpaat aningaasat tamakkiisumik qaffasissusissaannut Inatsisartut aningaasanut inatsisissami qanoq kissaateqarnerat apeqqutaasoq. Soorunami ersarilluinnarpoq aningaasanut inatsisip Inatsisartunit akuersissutigineqartarnera. Aammali aningaasanut inatsit tassaavoq inatsisissatut siunnersuut Naalackersuisunit akisussaaffigineqartoq taamaalillunilu Naalackersuisut tunngavilersuutaat kiisalu suliniutigineqartussanut assigiinngitsunut nalilersuinerat atuutsitsinerallu Inatsisartunit tunngavigineqartarluni – aamma inatsisitigut pituttorsimasuni.



INATSISARTUT

11. Siunnersuutip atuutilersinneqarnissaanut siunnersuummik naatsorsuutigineqartutut taamaalillutillu siunnersuutip siunnersuutip amerlanerusunik atuortoqalernissamut il.il. aningaasat naammassanersut imaluunniit naammassannginersut Naalakkersuisunut nalilersoqquneqarpoq.

Naalakkersuisut akissuteqaataata kalaallisut danskisullu allassimasup tiguneqarnissaa ataatsimiititaliamit qilanaaruneqarpoq. Akissuteqaatit ina@ina.gl kiisalu ataatsimiititaliap allattaaanut fr@ina.gl atorlugit nassuteqquneqarput.

Ulloq 21. maj 2017 qaangiunnerani akissuteqartoqarnissaa ilimagineqarpat akissuteqarnissamut piffissaliunneqartumut ilimagineqartoq pillugu Naalakkersuisunit ilisimatinneqarnissaani ataatsimiititaliap kissaatigaa.

Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliaq sinnerlugu

Inussiarnersumik inuulluaqqusillunga

Mimi Karlsen

Ataatsimiititaliamut siulittaasoq



Ilanngussaq 03

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsi-
miititaliaq

Pillugu: UPA2017/127 folkehøjskolit pillugit apeqquteqaatit

20-05-2017
Sagsnr. 2016 - 6765
Dok. nr. 5410609

Aallaqqaasiullugu Kultureqarnermut, Ilinniartitaanermut, Ilisimatusarnermut
Ilageeqarnermullu Ataatsimiititaliamut qujavunga, Ataatsimiitiliap pissutsit
assigiinngitsut qulaajaqqinnissaat pillugit 16. maj 2017 allakkamigut apeqquteqaataanut.
Tulliuttumi apeqqutit akissuteqarfigissavakka.

Postboks 1029
3900 Nuuk
Tlf: +299 34 50 00
Fax: +299 32 20 73
Email: ikiin@nanoq.gl
www.nanoq.gl

Ataatsimiititaliap allakkiaasa allaqqaataanni allassimavoq, nalinginnaasumik
nassuiaatini takuneqarsinnaasoq siunnersuutip pisortanut aningaasatigut
kingunissarisagai 2018-mut Inatsisissatut Siunnersuummi aningaasartuutissanik
nussuisoqartariaqarnera. Tamatumunnga ilanngullugu ilisimatitsissutigineqarpoq
tamatumunnga atatillugu Naalakkersuisut siunnersuutigissamaaraat 2018-mi
aningaasanut inatsisissatut siunnersuummi aningaasat konto pingaarneq 20.11.70-miit,
2017-mi aningaasanut inatsimmi suliniutinut nutaanut sillimmatit, folkehøjskolit
kontuannut pingaarnermut naleqquttumik annertussusilimmik nuussisoqarnissaa.
tiguneqarnissaat nassuiaatini takuneqarsinnaavoq naleqquttumik annertussusillit
3.071.000 kr.-nut nalilernerqarsimasut. Tusarniaanermi akissutigineqartunit
ataatsimiititaliamit paasineqarpoq tamatumunnga atatillugu Kommune Kujalleq aamma
Inuussutissarsiornermut Suliffeqarnermut, Niuernermut Nukissuteqarnermullu
Naalakkersuisoqarfik suut tulleriarineri tunulliunneqarnissaannik apeqqutinik
assigimik apeqquteqarsimasut. Taamaallillugu kingulliup ersarissumik erseqqissarpaa
pineqartumi tassani aningaasanik sinneqartoorutissaqannginnera. Tusarniaanermut
akissutit misissorneqarnerani tulleriarineri kissaatigineqartut pillugit ersarissumik
akissuteqartoqarsimangitsaq takuneqarsinnaavoq. Taamaaliornikkut tulleriarineri
suliniutinik pilersaarutinillu kingullinngortitsinerit pillugit nassuiaatit amingaatigineqarput.

1. Aningaasanik nikisiterineq akuerineqassappat suunuku suliniutit pilersaarutillu i-
ngerlatinnginnassallugit imaluunniit annikillisissallugit Naalakkersuisunit
kissaatigineqartut?

Akissuteqaat:

Apeqquteqaat kukkusumik tunngaveqarpassippoq, tassalu ingerlassanik allanik
tunulluutisoqassaneraanermik, siunnersuutip nassataanik aningaasaqarnikkut
kingunerisassat aningaasalersorneqarnissaattut naatsorsuutigineqartup
kingunerisaanik. Tamatumunnga ilaatigut pissutaassagunarpooq, oqaaseqaatini
aningaasaqarnikkut kingunerisassat pillugit immikkoortup taamatut paasineqarsimanera,
tassami eqqaaneqarmat, inuusuttunut anguniakkanit aningaasanik nuussisoqassasoq.
Kisiannili ilutigisaanik oqaaseqaatini allaqqavoq, Naalakkersuisut 2018-imut
Aningaasanut Inatsisissatut Siunnersuummi ilimagigaat siunnersuutigiumaarlugu,
inuusuttunut anguniakkani suliniutinut aningaasaliissutit kontomi pingaarnermi 20.11.70,
2017-mi aningaasanut inatsimmi suliniutinut nutaanut sillimmatikkut aningaasaliiffigisat,

Folkehøjskolit kontoannut pingaarnermut nuunneqassasut naapertuuttumik annertussusilimmik.

Soorlu Kommune Kujalliup tusarniaanermut akissutaanut oqaaseqaatini eqqaaneqartoq, matumani pineqarput inuusuttunut suliffeqaratillu ilinniartitaanerup avataaniittunut ikaarsaariarnissamut suliniutinut aningaasaliussat 5 mio. kr-usut, kontop pingaarnerp ilaatigut aningaasalersueqataaffigisinnaasaatut ilimagineqartut.

Taamaalilluni pineqartoq tassaavoq aningaasanik sillimmatit inissimasunik, taamaalillutillu suliniutinut aalajangersimasunut immikkoorteriigaanngitsunik, nuussinierneq. Aningaasalersuinissamut tunngavimmik erseqqissaaneq tamanna pivooq tusarniaanermut akissutit tunuliaqutaralugit. Taamaammatt Inuusutissarsiornermut Suliffeqarnermut, Niuernermut Nukissiuteqarnermullu Naalakkersuisoqarfiup tusarniaanermut akissutaanut atatillugu aamma oqaatigineqassaaq taamatut paasinninnermi eqqunngimmat, inuusuttunut suliniutini aningaasat sinneqassanngitsut.

Tassunga atatillugu kontollu pingaarnerp 20.11.70-ip siunertaa pillugu innersuunneqassaaq 2017-imut aningaasanut inatsit pillugu isumaqatigiissut, isumaqatigiissuteqartut akornanni 18. november 2016-imi isumaqatigiissutigineqartoq, tassani ersimmat pineqartut tassaasut sillimmatit, 2017-imi timitalerneqartussat, ilinniartitaanerup tamarmiusumik pilersaarusiorneranut ilaasumik, ataatsimoortumik atorneqarnissaannut erseqqissumik siunnersuuteqartoqareerpat. Taamaalilluni aningaasat suliniutinut aalajangersimasunut siumoortumik immikkoorteriigaanngillat. Naalakkersuisut naatsorsuutigaat aammattaaq 2018-imi kontomut pingaarnermut tassunga aningaasaliisoqarnissaa siunnersuutiginiarlugu, kisiannili aamma siunnersuutigilersaarlugu aningaasat taakku ilaat – kontomut pingaarnermut ilaasussaagaluit – folkehøjskolit kontoannut pingaarnermut nuunneqassasut.

Aammattaaq aningaasalersuinissamik pisariaqartitsinerneq tunngatillugu, apeqquteqaat 11-mut akissutit innersuunneqarput, tamatumunnga ilanngullugu aningaasalersuinissaaq aatsaat pisariaqalissammat, ingerlatat annertussusaasa tapiissutinut aningaasartaasut sanilliunnerani kingunerippassuk, maanna aningaasaliissutaasartunit amerlanerusunik aningaasartuuteqarneq.

2. Konto pingaarnep 20.11.70-mi suliniutigineqartuni pilersaarutigineqartunillu Folkehøjskolit suliniutaannik sooq pingaarnertitsinertik Naalakkersuisunut nassuiaatigeqquneqarpoq.

Akissuteqaat:

Pineqartoq tassaavoq højskolit suliniutaasa salliutinneqarnerunissaat. Aammattaaq ataatsimut isigalugu apeqquteqaat 1-imut akissutit innersuunneqarput.

3. Aningaasat sumut atorneqarnissaannik siunertaqartoqarsimanngippat aningaasat immikkoortinneqarsimasut sumut atorneqartussaagaluarnerat naatsorsuutigineqartup paarlattuanik Naalakkersuisut nassuiarsinnaanngippassuk sooq taamanikkut konto-mut pineqartumut aningaasaliisoqarnissaa Naalakkersuisut siunnersuutigisimaneraat nassuiaatigeqquneqarpoq.

Akissuteqaat:

Ataatsimut isigalugu apeqquteqaat 1-imut akissutit innersuunneqarput.

4. Folkehøjskoler naggataarutaasumik soraarummeernernut aningaasaliiffiqeqaqqinnerannut neqeroorsinnalernissaanut siunertarineqartumi iluaqutissat aamma ajoqutissat pillugit Naalakkersuisut nassuiaateqaqquneqarput.

a. Suna akikinnerussava: I) Folkehøjskoler Majoriamik suleqateqalissapput taamaalillutik folkehøjskolini ilinniartut Majoriami inaarutaasumik misilitsissinnaalerlutik? Imaluunniit II) Assigiinnik marlunnik pilersitsisoqassaaq, taamaalillutik meeqqat atuarfiani inaarutaasumik misilitsinnerit Majoriap aamma folkehøjskoler ingerlatilerlutik.

Akissuteqaat:

Aaliqaasiullugu oqaatigineqassaaq, folkehøjskoler meeqqat atuarfianni tamakkiisumik ilaannaanilluunniit inaarutaasumik misilitsinnissaq siunertaralugu maanna ilinniartitsisinnataataareermata, tak. Folkehøjskoler pillugit Inatsisartut inatsisaanni atuuttumi. § 1, imm. 3. Siunnersuutip periarfissaq tamanna annertusivaa, maanna erseqqissumik tunngavissillugu, folkehøjskoler ilinniartitsinermi inatsisartut aammattaaq misilitsitsinernik ingerlatsisinnaanngorlugit. Aammattaaq siunnersuummi ersippoq taamaaliortoqassappat tamanna pisassasoq, suliffeqarfik oqartussaasoqarfilluunniit ilinniakkap nalinginnaasumik neqeroorutigineqarfigisartagaa suleqatigalugu. Naalakkersuisut isumaqanngillat misilitsinnerit ingerlanneri imminermi annertunerusunik aningaasartuutaaneruffussasut, sumiluunniit ingerlanneqaralarunik. Aammattaaq folkehøjskoler namminneq nalilissavaat sulisoqarnermi inatsisartut misilitsinnissaq siunertaralugu ilinniartitsinermik – ilinniartitsinermik neqeroorutimik allat saniatigut - ingerlatsisinnaanngorlutik.

5. Majoriap illoqarfinni pineqartuni inaarutaasumik misilitsinneq tigummippassuk meeqqat atuarfiani inaarutaasumik misilitsinneranik tigumminissamut folkehøjskoler pisinnaatitaanissaat marloqiusamik sulinerlut isigineqarsinnaasorinarpoq. Taamatut marloqiusamik suliaqarneq tassungalu atatillugu marloriaammik aningaasalersuineq nunatta karsiani aningaasnik ikereeqisumik atorluannertut Naalakkersuisunit isigineqarpa?

Akissuteqaat:

Matumani marloqiusamik suliaqartoqarnissaa pineqanngilaq, tassami ingerlatsinertigut saaffigisaasut siunertarineqartullu aamma ilinniartitsinnerit aqqissugaaneri assigiinngilluinnarput. Saaffigisaasut ilaasa pisariaqartippaat højskolimi nalinginnaasumik peroriartuutaasumik inuttullu ineriartuutaasumik ingerlatsinissaq, ilutigisaanillu ilinniartitsissummi ataatsimi amerlaneruiluunniit ilinniagassatigut piginnaanngorsarnissartik, allalli taamaallaat Majoriami ilinniagassatigut piginnaanngorsarnissaq pisariaqartillugu. Ilinniarnermi avatangiiserisat immikkut itut, assersuutigalugu inuusuttunut suli ilinniagalersimannngitsunut, nalinginnaasumillu ilinniarnermi avatangiiseqarfiusumi ingerlaannaq ilinnialersinnannngitsunut pilerinartuusarput.

Tassuunakkutaaq pinngitsoorneqassaaq, ilinniartut ilaasa ilinniarfimmi ataatsimi ingerlatseriallutik allami ingerlatsisarnerat. Folkehøjskoler immikkut ittunik ilinniarnermi avatangiiseqarnerit pissutigalugu (aamma tak. apeqquteqaat 7-imut akissummi eqqaaneqartut), innuttaasut nalinginnaasumik ilinniarnermi avatangiiseqarfiusuni, tassalu ullup naanerani ilinniarfimmik qimatsiviusartuni, peqataatikkuminaattut katersorsinnaavaat. Taamaalilluni folkehøjskolernermut ilisarnaqutaavoq najugaqarfigigalugu nerisaqarfigalugulu ilinniarfimmiinneq, tassani ilinniartut

- a. Taamaattoqassappat: Ilinniagaqartoq nerisaqarnermut/ineqarnermut tapiissutinik pissarsisanngippat imaluunniit pissarsisarpat Naalakkersuisut siunnersuutaat malillugu ilinniartut tamarmik nerisaqarnermut/ineqarnermut inuttut ilanngaanneqartassasumik qanoq ataqatigiis-sinneqarsinnaava?

Akissuteqaat:

Folkehøjskolini ilinniarnermi atukkat ilinniarnermi atukkanit allanit allaanerussutigaat, ilinniartut ilinniartitsisullu ilinniartitsinerinnarmit imminnut ilisarilersannginnerat, aammali ulluinnarni pisartut allat aqqutigalugit ilisareqatigiilersarlutik, tassami ilinniarfimmi najugaqatigiillutillu nereqatigiittarput ataatsimoorussamillu ulluinnarisaqarlutik, immikkut illuinnartumik ilinniarnermi avatangiiseqalersitsiffiusumik. Taamaalilluni folkehøjskolimut taamatut najugaqarfigiitigalugu nerisaqarfigiitigalugu ilinniārneq ilisarnaqutaavoq, ilinniarnermi avatangiisit immikkut ittut akunnerni 24-ni perorsaanikkut isumaassuiffiusut iluaqtigisarlugit.

Folkehøjskolit pillugit Inatsisartut inatsisaannut atuuttumut oqaaseqaatini takuneqarsinnaasutut, najugaqarfigiitigalugu nerisarfigalugulu ilinniārni, tassaavoq folkehøjskolit nalissaqanngitsumik ilinniarnermi avatangiisaannut pissutaasut pingaarnert ilaat. Folkehøjskolillu oqalliseqatigiinnernut atatillugu isumaqatigiissutigineqarpoq, taamatut immikkut ittumik ilinniarnermi avatangiiseqarneq malittarisassat tapersissagaat, taamaalillunilu folkehøjskolini ilinniartitsinerneq ilaassasut nerisaqarneq najugaqarnerlu – nalinginnaasumik ilinniartit akerliannik, tamanimi ilinniartut ilinniarfitsik ilinniartitsineq naaniarortoq qimattarpaat. Taamaalilluni folkehøjskolerneq ataatsimoorutut isigisassaavoq, tamatumunnga ilaallutik nerisaqarneq najugaqarnerlu, taakkulu qaammammut stidepdianit ilanngaanneqartarput.

8. 2011-miit 2016-mut ukiumut agguaqatigiissillugu ilinniartut qassit folkehøjskolimi najugaqanngikkaluarlutik folkehøjskolimi tapiiffigineqarsinnaasumik atuarsimappat?

Akissuteqaat:

Sulisartut Højskolia ilisimatitsissutigaa, ilinniartut højskolernermik nalaani højskolimi najugaqarmissaat piumasaqaataasoq, aamma semesterit tamaasa Qaortormiut 1-2 ilinnialersartut, taakkualu højskolimi najugaqartartut. Knud Rasmussenip Højskolia ilisimatitsissutigaa ukiuni arlalinni semesterit tamaasa taamaallaat Sisimiormiut marluk ilinniartussatut akuerisaasarsimasut, kisiannili najugaqarnermut tunngasut kisitsisaatigineqanngitsut. Kisiannili ilimagineqarpoq pineqartut højskolimi najugaqartarsimassasut.

9. Siunnersuut una akuersissutigineqassappat ilinniartut illoqarfinni folkehøjskolinni najugaqartut tamakkiisumik ilinniagaqarnerneqarsissagunik folkehøjskolinut nuuttariaqarsinnaassapput taamaaliornikkullu inissanik tigussillutik. Nalinginnaasumik oqaaseqaatinni imm. 1.1 naapertorlugu folkehøjskolernissamut kissaateqartut sapinngisamik amerlasuut periarfissaqartinneqarmissaannik siunertamut Naalakkersuisut kissaatigisaannut tamanna qanoq naapertuuppa?

Akissuteqaat:

Pineqartut pillugit apequteqaat 8-mut akissutigineqartut innersuunneqarput.

10. Siunnersuutip atuutilersinneqarnissaanut siunnersuummik naatsorsuutigineqartut taamaalillutillu siunnersuutip siunnersuutip amerlanerusunik atuortoqalernissamat il.il. aningaasat naammassanersut imaluunniit naammassannginnersut Naalakkersuisunut nalilersoqquneqarpoq.

Akissuteqaat:

Apeqquateqaatinut 5-imut aamma 7-imut akissutini eqqaaneqartut nerisaqarnek najugaqarnerlu folkehøjskolernerup pissusissamisuuginnartumik ilagivai. Taamaalillutik folkehøjskolit ilinniarnermi avatangiisit immikkut ittut annaassavaat, ilinniartut taamaallaat assersuutigalugu ullaakkut ilinniariartoriartutik ualikkut ilinniarfik qimattassappassuk, nalinginnaasumik ilinniarfinni allani pissutsit assigalugit. Taamaalilluni højskolernerup nerisaqarlunilu najugaqarnermik ilaqarnera aallaavigalugu malittarisassaliorneq pivoq, folkehøjskolit immikkut ittumik ilinniarnermi avatangiiseqartuunerannik ataqqinninneq aallaavigalugu, tamannami folkehøjskolit ingerlatsinerannut immikkut ilisarnaqutaavoq. Taamaalilluni malittarisassaliorneq folkehøjskolit ilinniarnermi avatangiisaat naliitsut taperserpai, ilutigisaanillu folkehøjskolit immikkut ilisarnaqutaat attatiinnarneqarsinnaatillugit. Tassunga atatillugu ilimagisariaqarpoq, folkehøjskolit immikkut inissisimanertik annaassagaat, ilinniartitseriaaseq nalinginnaasumik ilinniarfinnisut pialissappat.


Naalakkersuisut isumaqanngillat pissutsit tamakku sukkulluunniit akornutaasinnaasut, højskolerusuttut sapinngisamik amerlanerpaat højskolernissamat periarfissinneqarnissaannut.

11. Siunnersuutip atuutilersinneqarnissaanut siunnersuummik naatsorsuutigineqartut taamaalillutillu siunnersuutip siunnersuutip amerlanerusunik atuortoqalernissaanut il.il. aningaasat naammassanersut imaluunniit naammassannginnersut Naalakkersuisunut nalilersoqquneqarpoq

Akissuteqaat:

Tamatumunnga atatillugu oqaatigineqassaaq, aningaasaqarnikkut kingunerisassatut allasimasunut tunngavigisat pioreersut tunngaviummata. Tunngavigisat tamakku siunnersuummut oqaaseqaatini aamma aningaasaqarnikkut kingunerisassat pillugit 10. maj Ataatsimiititaliamut allakkiami eqqaaneqarput. Taamaalilluni oqaatigineqartut aningaasaqarnikkut tunngavigisanut pissutsit arlaqartut apeqquataassapput. Tamanna pillugu allakkiami taaneqartumi sukumiisumik allaaserisaasut innersuunneqarput. Allakkiami ilaatigut eqqaaneqarpoq, qaffariaatit aatsaat 1,2 mio. kr-ussasut ingerlassat 50 %-imik annertusippata – ingerlatsinermmut tapinut aamma taxameteri malillugu tapinut akil eqqaaneqartut aallaavigalugit.

Inussiarnersumik inuulluaqqusilluta



Doris Jakobsen